

Miaina
MIHOATRA NY MAHAZATRA

William MacDonald

MIAINA MIHOATRA NY MAHAZATRA

Fanehoana ireo herim-po hananana fiainana manahaka an'i Kristy

Fiainana Kristiana

Natonta voalohany ny taona 2025

ISBN 978-2-9593001-7-2



© The copyright owner is Christian Mission in Many Lands, Inc. PO Box 13, Spring Lake, NJ 07762, USA - Translated by permission. All rights reserved.

© 2025 Ambiô Afafy, Antsiranana

Nalaina avy tao amin'ny Baiboly Malagasy (Dikan-teny 1909) avokoa ireo andinin-tSoratra Masina rehetra ato amin'ity boky ity.

Sary Cover: 123rf.com

Natontan'i:

Ambiô Afafy Edisiona

Rue Cabot - AVENIR, 201 Antsiranana

+261 20 85 001 00

boky@ambioafafy.africa

FIZAHAN-TAKELAKA

Toko voalohany Inona re no nataon'i Jesosy eh?	1
Toko faharoa Sakaizana'Andriamanitra	6
Toko fahatelo Apostolin'ny fitiavana	9
Toko fahefatra Fiadanana lehibe ao anaty fahoriana	16
Toko fahadimy Ny vidin'ny fankatoavana	19
Toko fahenina Mpandresy anaty fahalemena	23
Toko fahafito Tsy misy fanompoana ambany loatra izany	26
Toko fahavalo Ilay zanaka lahin'ny Scotland izay nampirehareha azy	29
Toko fahasivy Ilay jeneraly nanetry tena	36
Toko fahafolo Na salama na marary	38
Toko faharaika ambin'ny folo Kapiteniko	42
Toko faharoa ambin'ny folo Naman'izay nahilika ao amin'ny fiaraha-monina	47
Toko fahatelo ambin'ny folo Mamaly soa ny ratsy	48
Toko fahefatra ambin'ny folo Nanolotra ny takolany ilany izy	52
Toko fahadimy ambin'ny folo Ny afo mafana indrindra	54
Toko fahenina ambin'ny folo Tiava ny fahavalonao	56
Toko fahafito ambin'ny folo Ny famelan-keloka dia araka an'andriamanitra	59
Toko fahavalo ambin'ny folo Ny halafon'ny fihavanana	62

Toko fahasivy ambin'ny folo	65
Miaritra henatra sy fandrorana	
Toko faharoapolo	67
Ilay jiosy mpividy fako	
Toko faharaika amby roapolo	69
Ilay gladiateran'ny emperora	
Toko faharoa amby roapolo	72
Ilay didy voalohany misy fampanantenana	
Toko fahatelo amby roapolo	75
Ilay andriamanitra tia	
Toko fahefatra amby roapolo	81
Fahasoavana mahagaga	
Toko fahadimy amby roapolo	85
Nitia ny mahantra izy	
Toko fahenina amby roapolo	88
Tsy mikiraro any am-piangonana	
Toko fahafito amby roapolo	90
Ilay tifitra tao amazonia	
Toko fahavalo amby roapolo	95
Loisa sy ilay mpanangona fako	
Toko fahasivy amby roapolo	100
Tsy ho ampy ny fotoana...	
Toko fahatelopolo	107
Miaina mihoatra ny mahazatra	
Endnotes	109

Raha azo hazavaina amin'ny fomba fijerinao ny fomba fiainanao amin'ny maha-Kristiana anao, inona no hatolotrafo ho an'ireo mpiray vohitra aminao? Ny fomba fiainany dia azo hazavaina amin'ny azy, ary raha ny momba azy dia "religion" ianao fa tsy izy! Ny Kristianisma dia mety ho fialam-boly anao, saingy tsy izany, ary tsy misy na inona na inona amin'ny fomba fanaonao izay mampitolagaga azy. Tsy misy na inona na inona momba anao izay mamela azy haminavina, ary na inona na inona mendri-piderana izay tsy tsapany fa mahavita mitovy amin'izany izy raha tsy misy fahasaratana amin'ny fahatongavana ho Kristiana.

Major Ian Thomas

INONA RE NO NATAON'I JESOSY EH?

Tao aorianan'ny vavaka an-tendrombohitra nataon'i Jesosy no nisafidianany ny mpianatra roa ambin'ny folo lahy. Niantso azy ireo hoe „Apostoly“ Jesosy satria haniraka azy hitory ny Filazantsara. Ny dikan'ny teny hoe apostoly dia „ilay iraka nalefa“.¹

Rehefa tafidina avy any an-tendrombohitra izy ireo dia nanomboka nampiofana azy i Jesosy. Tamin'ny voalohany, dia nijery sy nanitsy ny fomba fiainan'izy ireo aloha i Jesosy. Nila niaina tamin'ny fanolorantenany, matotra tamin'ny izay niantsoana azy, hanetritena ary hahery anaty fanenjehana noho ny Aminy.

Avy eo Izy dia namaritra ny tokony ho fitondrantenan' izy ireo.

„Kanefa hoy Izaho aminareo izay mihaino: Tiava ny fahavalonareo; manaova soa amin'izay mankahala anareo; misaora izay manozona anareo, ary mivavaha ho an'izay manisy ratsy anareo. Raha misy mamely ny takolakao anankiray, dia atolory azy koa ny anankiray; ary raha misy maka ny lambanao, aza lavinao na dia ny akanjonao aza. Omeo izay rehetra mangataka aminao; ary raha misy maka ny nananao, dia aza manaraka izany aminy. Ary araka izay tianareo hataon'ny olona aminareo, dia mba ataovy aminy kosa. Fa raha izay tia anareo ihany tianareo, inona moa no soa tokony ho azonareo? Fa na dia ny mpanota koa aza mba tia izay tia azy. Ary raha izay

manisy soa anareo ihany no asianareo soa, inona moa no soa tokony ho azonareo? Fa na dia ny mpanota aza mba manao izany ihany. Ary raha mampisambotra izay antenainareo fa mbola hanonitra ianareo, inona moa no soa tokony ho azonareo? Fa na dia ny mpanota aza mba mampisambotra ny mpanota, handraisany toraka izany indray. Fa tiava ny fahavalonareo, ary manaova soa, dia mampisambora, fa aza kivy na amin'inona na amin'inona, dia ho lehibe ny valim-pitianareo, ary ho zanaky ny Avo Indrindra ianareo; fa Izy mora fanahy amin'izay tsy misaotra sy ny ratsy fanahy. Aoka ho mpamindra fo ianareo mba ho tahaka ny Rainareo, Mpamindra fo.” (Lioka 6:27-36)

Inona ny zavatra tonga ao an-tsainao manoloana ireo didy napetraky ny Tompo ireo? Hiteny ve ianao hoe „Eny, tena izay tokoa no inoako. Ary izay koa no tokony ho ataon'ny Kristiana rehetra.“ Raha mahazo antoka ianao fa miaina toy izany daholo isika, dia manasa anao aho hamerina hamaky an'io andalan-tsoratra masina io ka handinika ny amin'izay voalazany.

Ny zavatra ampianarin'ny Tompo eto dia tena fomba fiaina hafa mihitsy. Tsy fitondrantena fotsiny ihany. Miaina mihoatra noho ny maha-olombelona nofo sy rà, fiainana manana fenitra ambony kokoa. Jesosy dia mibaiko fa ny fiainako dia tokony miavaka noho ny an' ireo manodidina ahy. Raha toa mantsy ka tsy misy mampiavaka ahy amin'izy ireo dia tahaka ny miteny aho hoe „tahaka anareo ihany aho e“. Ary raha tsy misy ny mampiavaka ahy amin'izy ireo dia inona moa no tokony

hihainoany ahy raha mitady fatratra ny hizara momban'i Kristy amin'izy ireo aho? Izay toetra mampiavaka izay indrindra no resahina eto: fiainana mihoatra noho ny mahazatra.

Etsy andaniny anefa, raha hitan'ny manodidina ny fahasamihafan'ny fiainanay, dia ho azon'izy ireo mora foana ny antony izay tokony amoahany ny varavarany ka iresahako sy izaràko ny Filazantsara amin'izy ireo. I Major Ian Thomas, mpanorina ny Torchbeares dia nilaza izao hoe:

„Mety hanaitra kokoa ny manodidina ianao rehefa manana fiainana miavaka. Tsy vitan'ny hoe fiainana mendri-piderana tsotra ihany anefa, fa ihoatra noho ny fahatakaran'ny fisainan'ny olombelona mihitsy satria tsy ho voazava amin'ny fisainana fotsiny ihany tsinona izany. Na ho gaga sy talanjona aza izy amin'izany fiainana izany dia ho hitany taratra aminao foana Andriamanitra.“

Raha fintinina amin'ny teny mazava izany dia tokony ho hitan'ny manodidina fa i Jesosy Kristy no tena antom-piainanao sy antom-pisinao.

Ny tsy kristiana dia hitantsika mafana fo tokoa amin'ny hetsika maro be tahaka ny fanampiana marary, mikarakara ny sahirana sy ireo zokiolona, mahalala tanana amin'ny asa fiantrana ary maro hafa ihany koa. Fa isika kosa dia antsoina hanao mihoatra ny noho izany ho an'ny tsy voavonjy.

Tsy voatery kosa anefa hoe rehefa mafana fo amin'ny fitoriana ny tsy voavonjy dia tsy maintsy hiova fo daholo

izy rehetra. Misy foana ny misafidy tsy hanaraka an'i Kristy. Isika kosa nampianarin'i Jesosy hanaraka izay nataony fony teto an-tany.

Ny olona manaraka an'i Jesosy ihany koa dia hiaran'ny fanenjehana, matetika ary lazaina fa marary na tsy salama saina mihitsy aza.

Taona maro lasa izay, i Fyodor Dostoevsky, mpanoratra tantara rosianina, dia nanoratra boky² iray izay nanandramany hanehoana ny Mpanjaka Myshkin ho santionany lavorary amin'ny maha-olombelona. Tsy azon'ny olona loatra ny fiainan'ilay Mpanjaka. Nihevitra azy ho adala mihitsy aza izy ireo. „*Ilay Adala*“ no lohatenin'izany boky izany. Arakaraka ny itovizantsika amin'i Kristy no vao mainka aratsiana sy lazain'ny olona ho toy ny adala.

Marina àry ny tenin'ny apostoly Paoly, fa hanitry ny „fiainana ho amin'ny fiainana“ ho an'ny sasany isika, ary hanitry ny „*fahafatesana ho amin'ny fahafatesana*“ ho an'ny hafa. Mampiaiky volana azy ireo isika na koa mahatohina azy ireo ny Mahita antsika manao zavatra araka an'Andriamanitra amin'ny lafiny roa ireo anefa dia zanak'Andriamanitra isika rehefa manaraka izay lazainy sy ampianariny.

Ao amin'ireo pejy manaraka, dia hahita tantara maromaro isika amin'ny fotoana izay nandraisan'ireo Kristiana ny tenin'i Jesosy ara-bakiteny tamin'ny alalan'ny fitiavana ny fahavalony, ny famelan-keloka ny fahavalony, ny famaliana soa ny ratsy, ny fiaretana tsy nisy valifaty, ny fanomezana tsy miandry tambiny. Raha ho faritana anaty fanontaniana iray dia hoe

„Amin’ny olana iray mitranga amin’ny fiainanao, mba ahoana no fomba nampiaran’i Jesosy manoloana izany?”

Toko faharoa

SAKAIZAN'ANDRIAMANITRA

I Henri Suso dia teratany Alemana, nanaraka fomba fivavahana miavaka niaina tany amin'ny taona 1300 tany ho any. Fantatra tamin'ny anarana hoe „Sakaizan'Andriamanitra“ izy sy i Paul Tersteegen ary mpino vitsivitsy hafa. Lehilahy „*nitoetra teo amin'ny fonenan'ny Avo Indrindra*“ izy ireo. Tahaky ireo izay voalaza fa „sambatra“ ao amin'ny Salamo 1, ireo izay niaina ilay hoe „*ny lalàn'i Jehovah no sitrany; eny ny lalàny no saintsaininy andro aman'alina*“. Niaina ny maha-mponin'ny lanitra azy izy ireo. Ary tena nanana fitondrantena tena mendrika.

Indray andro nisy nandondona teo am-baravaran'i Suso. Rehefa namoha izany izy dia vehivavy iray izay tsy mbola hitany mihitsy no manoloana azy, vehivavy mitroto zazakely. Tsy nampilaza akory fa tonga dia natsipin'ilay vehivavy teny an-tànan'i Suso ilay zaza, sady niteny izy hoe „Ity e, ity ny vokatry ny otanao!“, dia lasa izy nandeha.

Gina i Suso, tsy nahateny sady sahiran-tsaina. Toy ny nilatsaham-baratra izy nandre ilay fiampangana tsy mari-pototra nataon'ilay vehivavy. Nijanona nitsangana teo izy miaraka amin'ilay zazakely eny an-tanany. Tsy isalasalana fa tena vokatry ny otan'ilay vehivavy tokoa ilay zaza fa tsy azy. Raha amin'ny andro ankehitriny dia afaka nataon'ilay vehivavy tao anaty harona plastika ilay zaza dia natsipiny tao anaty fanariam-pako. Saingy, naleony nisafidy ny hanameloka olon-kafa.

Niely haingana nanerana ny tanàna ny vaovao momba ilay zava-nitranga, ka nampiharihary an'i Suso ho mpisoloky ara-pivavahana. Tsy mpihatsara-velatsihy na mpisoloky anefa izy. Ny hany azony natao dia ny nihataka nanalavitra ny manodidina azy sy nitaraina tamin'ny Tompo.

„Inona no tokony ataoko Andriamanitra ô? Fantatrao tsara fa tsy manantsiny aho“

Nazava tsara ny valinteny voarainy tamin'izay: „ataovy izay nataoko; miareta fahoriana noho ny fahotan'ny hafa, ary aza miteny na inona na inona“. Nanavao ny fomba fahitan'i Suso ny hazofijaliana izay ary nahita fiadanam-panahy izy taorian'izay.

Notaizainy toy ny zanany naterany ilay zaza, ary tsy niaro tena tamin'ny fiampangana azy mihitsy izy.

Taona maro taty aoriana, dia niverina teo amin'ilay tanàna ilay vehivavy sady nanambara tamin'ny mponina rehetra tao fa tsy manantsiny i Suso, ary diso tanteraka ny fiampangana izay nataony azy. Efa nahavanon-dratsy izy, saingy Andriamanitra nanova izany ho amin'ny tsara. Vao maika nitombo amin'ny fanahafana ny endrik'i Kristy i Suso ary nahazo ny fandresena izy.

Hitantsika ao amin'ny Testamenta Taloha fa niaina alahelo sy nizaka ny tsy rariny i Josefa noho ny fiampangana lainga nihatra taminy. Nampangain'ny vadin'i Potifara ho saika nanolana azy izy, ary dia naka ny akanjon'I Josefa mihitsy aza ho porofo niampangana an'izay noheverina fa otany. Nitoky tanteraka tamin'i Jehovah anefa izy, ka niankina taminy ho fanamarinana azy.

Niampangaina lainga ny Tompo Jesosy. Nanamafy ny fahavalony fa teraka tsy ara-dalàna Izy. Nohazonin'izy ireo hatrany fa tamin'ny herin'i Satana no nanaovany ny fahagagana. niampangaina ho manohitra ny fitondrana Romana koa Izy. Na izany aza dia afaka niteny tamin'ny fotoan-tsarotra indrindra Izy hoe: „*Na dia izany aza, Raiko, fa izany no sitrakao*“.

Mandray lesona amin'izany ohatra nasehony izany isika fa tsy mila manamarina ny tenantsika na koa mitady vahaolana ny amin'izay mety ho mafy mahazo antsika. Avelan'Andriamanitra hitranga ny ota, fa hampiharihary ny mpiampanga, ary hanome voninahitra an'ilay niharan-doza.

APOSTOLIN'NY FITIAVANA³

Robert Chapman dia tanora notezaina tao anaty fianakaviana manan-karena, nanana trano be, nanana mpiasa maro, ary nanana fiara maro. Mpivavaka ny fianakaviana fa tsy tena Kristiana.

Tamin'izy roapolo taona dia nisy namany nanasa azy hihaino an'i James Harrington Evans nitory teny. Kihondalana lehibe teo amin'ny fiainan'i Chapman izany. Niova fo ho an'Andriamanitra izy tao anatin'ny andro vitsivitsy.

Hitany tao amin'ny Testamenta Vaovao fa tokony ho atao batisa ny mpino, ka nangataka an'Andriamatoa Evans hanao batisa azy izy. Hoy kosa Evans: „Tsy heverinao ho tokony hiandry kelikely sy handinika ve aloha ianao“.

Namaly i Chapman hoe: „Tsia, heveriko fa tokony hankatò faingana ny didin'ny Tompo aho“.

Nanaraka azy nandritra ny androm-piainany izany toetsaina izay toa tsy dia misy dikany nefa feno fankatoavana izany.

Na dia lasa mpisolovava nahomby aza izy, dia nahatsapa fa niantso azy ho amin'ny asa maha-kristiana manontolo ny Tompo. Tsy nanana fiadanana izy raha tsy nahafoy ny zavatra rehetra hanaraka an'i Kristy. Raha ny momba azy, ny fandozana ny "rehetra" dia idika hoe mivarotra ny fananay, manome ny harenany, ary miala amin'ny sata sy ny lazany. Asa eo anivon'ny

mahantra ny faniriany. Sady voalaza koa hoe „*Mihainoa, ry rahalahy malalako: Tsy efa nofidin'Andriamanitra va ny malahelo amin'izao fiainana izao ho mpanankarena amin'ny finoana sy ho mpandova ny fanjakana nolazainy homena izay tia Azy?*“ (Jak. 2:5).

Moa ve tsy tokony hitoriana ny Filazantsara koa va ny mahantra (Mat. 11:5)? Ary moa tsy ny vahoaka betsaka nihaino Azy tamin'ny hafaliana (Mar. 12:37)?

Ny zavatra hitan'ny olona dia ity ”mpisolovava tanora sy mitsikitsiky lava” ity izay mitondra amim-pitiavana ireo vehivavy mahantra sy jamba izay tsy mba nanana olon-kafa hitondra azy ireo eo ho amin'ny fanompoana. Ary rehefa mandalo eo amin'ny lalantsara izy ireo dia nananatra ireo izay na dia tsara aza ny fampianarana azony dia tia tena sy tsy feno fitiavana eo amin'ny fiainany.

Farany dia nifindra tany amin'ny faritra ambanivohitra iray any Barnstaple any Angletera I Chapman, mba anakaiky ireo izay nahilika sy tsy tiana. Fiainana feno fahamamoana, fahalotoana, voalavo an-dalambe, tranon'aretina ary fahantrana lalina no nisy tany. Nanohy ny ministerany hatrany anefa izy ary nandray tsara ireo nasainy tao an-tranony.

Hoy izy „betsaka no mitory an'i Kristy saingy vitsy no miaina an'i Kristy. Ny tanjona lehibe amiko hoy izy dia ny miaina an'i Kristy“. Taona maro taty aoriana dia izao no volazan'I John Nelson Darby momba an'i Chapman „miaina izay teny notoriako izy“.

Nomen'ny namana kristiana akanjo vaovao i Chapman rehefa rovitra ny akanjony, saingy tsy mbola hitan'ilay nanome azy nanaovany mihitsy izany.

Nomeny ny mahantra izay tsy manana izany akanjo izany. Ny nahagaga an'i Chapman dia ny fiheveran'ny olona fa zavatra miavaka izany.

Very hevitra ireo havany sy ny namany mahita ny fiainany feno fahafoizan-tena. Nisy iray nanapakevitra ny hitsidika azy mihitsy hijery ny zava-misy. Rehefa nijanona manoloana ny tranon'i Chapman izy dia nibedy mafy ilay mpitondra fiarakaretsaka ilay havany.

„Hoento any amin'ny tranon'i Chapman aho hoy aho taminao!“ „Ity tompoko ilay trano“

Noho ny tafiditra tao an-trano izy ireo, taitra ilay mpitsidika ka niteny hoe „Inona no ataonao ato ry Robert?“

„Manompo ny Tompo eo amin'ny toerana izay nanirahany ahy aho“

„Ahoana ny fiainanao? Manana tahiry any amin'ny banky ve ianao?“

„Matoky ny Tompo fotsiny aho dia miteny Aminy izay ilaiko. Tsy mbola nandiso fanantenana ahy Izy ary mitombo hatrany ny finoako, dia mitohy ihany koa ny asa“.

Hitan'ilay mpitsidika fa efa tsy nisy inona firy intsony ny tao an-dakoziany ka nanome ividianany sakafo izy. Naniraka azy hiantseña tamin'ny toerana iray izy. Raha ny marina, dia nankahala mafy an'i Atoa Chapman io tompon'ny tsena io. Rehefa nasaina nanatitra sakafo be dia be ho an'i R.C Chapman ilay mpivarotra, dia talanjona izy. Nandeha faingana tany an-tranon'i Chapman izy nanatitra ny entana nafarana, ary tamin'ny

fibebahana marina sy tamin-dranomaso no nangatahany fifonana. Ankoatra izany, dia nanaiky an'i Kristy ho Tompo sy Mpamonjy azy izy.

Lasa ampahany ngeza be teo amin'ny fanompoany ny fandraisam-bahiny. Nividy trano tandrifin'ny tranony teo ampitan'ny arabe i Chapman ary nangataka tamin'ny Tompo mba handefa vahiny nofidiny handalo ao. Tsy nisy vola naloa, ary tsy nisy nanontaniana akory hoe rahoviana ireo vahiny no mikasa ny handeha. Nasaina nametraka ny kirarony teo ivelan'ny varavarany ireo vahiny, isaky ny alina. Nony maraina dia efa voadio avokoa izy rehetra. Izany no fomba nanehoan'I Atoa Chapman izany hoe manasa ny tongotry ny vahininy. Ny fampiantranoana nasehon'ity lehilahy tokantena ity dia natao hampianarana ny vahiny momba ny fiainam-pinoana sy ny fanompoana ny vahoakan'ny Tompo. „Nisy hafaliana lehibe teo amin'ny latabatra, ary teny feno fahendrena sy fahasoavana hatrany no re tao; tsy mba nomena toerana tao ny fifampiresahana hivadika ho resaka tsy misy dikany. Anisan'ny fitsipika tao an-trano ny tsy tokony hanaratsiana olona tsy eo, ary izay fandikana an'io fitsipika io dia mahatonga fananarana mafy na dia feno fankasitrahana aza“.

Ny hatsaran-toetra izay nahafantarana an'i Robert Chapman dia ny fitiavana. Nivoady ny iray tamin'ireo mpitsikera azy fa tsy hanan-draharaha aminy mihitsy izy. Tsy hiresaka aminy intsony izy. Indray andro izy ireo dia samy nandeha teny an-dàlana ary ka nifanantona. Rehefa nifankahita izy ireo, dia namihina an'ilay lehilahy i Robert ary niteny hoe: „Ry

rahalahy malala, tia anao Andriamanitra, tia anao i Kristy ary tiako ianao.“ Nibebaka ilay lehilahy ary niverina namonjy fotoam-pivoriana indray.

Na dia toa tsy mampino aza, dia nisy namana iray any amin'ny firenena vahiny nandefa taratasy ho an'i Chapman ka izao fotsiny no nanoratany ny adiresiny: R.C Chapman, Oniversité ny FITIAVANA, Angletera. Ary dia voarainy soamantsara ilay taratasy.

Tsy dia tian'Andriamatoa Chapman loatra ny fanindrahindrana ireo karazana anarana ao amin'ny fiangonana, ho azy ny zava-dehibe dia ny mitia ireo tena zanak'Andriamanitra rehetra, na inona na inona toerany eo anivon'ny fiangonana. Rehefa nisy vondrona iray tao anivon'ny fiombonan'izy ireo no te-hisarakana sy nihanjo ho tompon'ny fananana, dia nanaiky ny fangatahan'izy ireo izy. Rehefa naniry haka ny tany novidin'i Chapman ho an'ny fivondronana ny governemantan'ny tanàna, dia nilefitra izy. Tsy nitondra ireo raharaha ireo ho eny amin'ny fitsarana mihitsy izy, na dia eo aza ny fahaizany manokana amin'ny maha mpisolovava azy. Tsy mba nanao zavatra maimaika izy, fa maka fotoana hivavahana. Indray mandeha, rehefa nanamarina an'i J.N Darby izy fa nanao zavatra maimaika loatra, dia niaro ny fihetsiny i Darby tamin'ny filazana hoe: „efa niandry enina herinandro isika“, hoy i Chapman namaly hoe, „mety ho niandry enin-taona isika“.

Nanan-danja taminy tokoa ny fampiarana izay lazain'Andriamanitra (nanokana fotoana tamin'ny vavahana, famakiana ny Teny, sakafo, famangiana olona, fiantrana ny mahantra sy sahirana ara-

pivelomana, ny fitoriana an-kalamanjana, ary ny fampianarana Baiboly i Chapman. Nifady hanina izy isaky ny sabotsy ary nandrafitra izy, ka nanao takelaka vita amin'ny hazo ary nataony fanomezana ho an'ny olona izany.

I Frank Holmes, iray amin'ireo nanoratra ny tantaram-piainany, dia nilaza izao momba ny aminy: „raha fiainam-pahamasinana, ny lanjan'ny toetra, ary ny fahafoizan-tena, dia vitsy ny tahaka azy, nefa izy dia tsotra sy feno fanetren-tena tahaka ny zaza. Tena lehilahy ara-panahy izy. Tsy nila fampafantarana manokana momba azy fa hita taratra teo amin'ny fiainany izany“.

I Kristy dia nampianatra ireo mpianany fa tokony hihoatra noho ny mahazatra ny fiainany raha tiany hisy fiantraikany noho ny Aminy izany. Hitantsika fa nahafeno izany tanteraka ny fiainan'i R.C Chapman. Nisy tamin'ny havany tena liana ny amin'ny anton'ny nahatonga an'i Robert hanaraka any'izany fomba fiaina tsy mahazatra izany. Tsapany fa hery anaty izay tsy fantany mihitsy no nitarika an'i Chapman. Tapa-kevitra ny hitady izay tsy ampy aminy izy. Nolazainy tamin'i Chapman mazava tsara ny toerana nisy azy. Niara-nivavaka izy ireo avy eo niara-nianatra ny Baiboly. Ny vokany dia rehefa nody ilay vahiny dia niova olombaovao izy.

Amin'izao vanim-potoana iainantsika izao miaraka amin'ny hafetseny sy ny tetika ampiasainy dia toa lehilahy avy any amin'ny tontolo hafa mihitsy ny olona toa an'i Robert Chapman, tahaka ny hoe olona avy any amin'ny planeta Martsa. Ary tena marina tokoa izany

fa avy any amin'ny tontolo hafa izy. Niaina an'ilay hoe „Ny mitoetra ao amin'ny fierena izay an'ny Avo Indrindra Dia monina eo ambanin'ny aloky ny Tsitoha“ izy. Tahaka ilay olona nofaritan'i A.W Tozer hoe:

„Hafahafa tokoa ny olona tena ara-panahy. Tsy velona ho an'ny tenany izy fa velona mba hampandroso ny tombontsoan'ny hafa. Mikatsaka ny handresy lahatra ny olona izy mba hanome ny zavatra rehetra ho an'ny Tompony, ary tsy nangataka anjara ho an'ny tenany. Tsy sitrany ny homem-boninahitra fa ny mahita ny Tompony misandratra na dia tsy voakarakara aza ny tenany.

Hitany fa vitsy ny olona te hiresaka momba izay tena zava-dehibe indrindra amin'ny tombontsoany, ka matetika izy no mangina sy variana amin'ny feo an'eritreritra mitabataba momban'ny finoana. Noho izany dia mahazo ny lazany ho donto sy matotra loatra izy ka ahilika ary dia mihamitombo ny hantsana eo aminy sy ny fiaraha-monina. Nitady namana izay hahenoany ny fofon'ny miora sy aloesy ary kasia eo amin'ny fitaifiany izy, ka vitsy na tsy mahita na iray aza, tahaka an'i Maria fahiny nitahirany izany tao am-pony.“⁴

Enga anie ka hataontsika ho fanamby koa izany ka ho mpino ara-panahy tokoa isika eo amin'ny olona manodidina antsika.

FIADANANA LEHIBE AO ANATY FAHORIANA⁵

Taona maro lasa dia nisy tantara tsy hay adinoina izay notantarain'i H.A Ironside. Tantara momba ny vehivavy mpitondratena avy any Aostralia. Izany vehivavy izany dia tena kristiana olon'Andriamanitra. Niharihary tamin'ny rehetra ny halalin'ny arapanahiny. Ny fiainany dia voamariky ny finoany tsy voahozongozona sy ny fanekena lalina ny Tompo.

Rehefa maty ny vadiny, dia nitaiza irery ireo zanany lahy dimy izy. Tao amin'ny Salamo 146:9 no nanovozany hery: „*Jehovah ... manandratra ny kamboty sy ny mpitondratena*“. Teny fampanantenana izay tena nohazoniny sy notakiany mafy tokoa izany. Nanana tombony ho voataiza tao anaty „*fanabeazana sy fananarana araka ny Tompo*“ ireo zazalahy ireo. Ary tamin'ny fotoany, dia nanaiky an'i Jesosy ho Tompo sy Mpamonjy azy izy ireo.

Dia nipoaka ny ady ary namaly ny antso ho an'ny tanindrazana izy dimy lahy. Angamba noho ny fangatahan'izy ireo manokana no nanendrena azy ireo tao amin'ny rezimanta miaramila iray ihany. Noentin'ny reniny teo amin'ny Tompo isan'andro izy ireo, satria fantany fa Izy no miahy sy mitandrana ny fiainany.

Indray andro raha nitazana teo am-baravarankely izy dia nahita lehilahy iray nandroso mankeo amin'ny varavarana fidirana. Fantany avy hatrany hoe iza io olona io. Ny minisitra no sady lehiben'ny fokontany, voatendry hampandre ny fianakaviana rehefa misy

olona maty na tsy hita popoka. Kristiana nafana fo koa izy, ary nanana andraikitra mafimafy ihany.

Nandeha teo am-baravarana izy ary nijoro teo izy nitondra valopy mavo teny an-tanany. Toa nijanona ny fotoana. Rehefa avy nifampiarahaba izy ireo, dia nampiantrano azy izy. Nony tafapetraka izy ireo, izay vao nanontany azy ilay ramatoa hoe:

„Iza amin’izy ireo?“

Sarotra taminy ny namaly. Natahotra izy sao ho taitra noho ny vaovao izy. Niandry valinteny anefa ilay ramatoa, te-hahafantatra hoe iza amin’ireo zanany no maty tamin’ny ady.

Farany, dia niteny ilay rangahy hoe „izy dimy“.

Nangovitra ny tarehiny. Nangovitra ny saokany. Feno ranomaso ny masonry. Dia hoy ilay ramatoa tamin’ny fahatokiana feno hoe: „Efa Azy avokoa izy rehetra. Nalainy izy rehetra ho any Aminy“.

Niara-nandohalika nivavaka izy ireo avy eo.

„Tsy nisy kiakiaka, tsy nisy fimenomenonana, tsy nisy fangidiana, tsy nisy fitarainana. Nankininy tamin’Andriamanitra Izay mahatandrina ny fanekeh-pihavanana ny zanany lahy rehefa nandao ny tranony izy ireo noho ny antso ho an’ny tanindrazany, ary fantany tsara ny Mpamonjy azy ka tsy nisalasala ny amin’ny fitiavany na ny fahendreny ilay ramatoa. Ny azy dia ny fiadanana izay tsy takatry ny saina, ary ny fijoroany ho vavolombelona tao amin’io tanàna io dia nanana dikany bebe kokoa noho ny toriteny rehetra notoriana nandritra ny taona maro“.

Ny tantara dia tsy milaza fa ny mpino rehetra dia afaka

manao fihetsika mitovy amin'ny nataon'io mpitondra-tena kristiana io. Mazava ho azy fa nanome fahasoavana manokana azy ny Tompo noho ireo zavatra nesorina taminy ireo. Tsy henatra na tsy fahombiazana akory ny mitomany amin'ny fahafatesan'ny olon-tiana. Na ny Tompo Jesosy aza dia nanao izany. Asehon'ilay zavanimitranga anefa fa miavaka ny Kristiana rehefa miatrika alahelo sy fahoriana, ka rehefa mijery izao tontolo izao dia talanjona. Rehefa mihazona ny teny fikasan' Andriamanitra ny mpino dia manana loharano miafina izay tsy fantatry ny hafa mihitsy.

NY VIDIN'NY FANKATOAVANA

Nanana fiainana tena tsotra sady nilamina i Bud Brunke. Nanana vady be fitiavana izy, Janice, zanaka enina, nanana asa nilamina tao amina seranam-piaramanidina kely iray tany Elgin, Illinois. Nihevitra izy hoe efa miadana sy nahatsiaro sambatra.

Fa rehefa nieritreritra ny mahakasika ny fiainampanahiny anefa izy dia nanomboka tsy nilamina ny sainy ary lasa saina mihitsy aza. Efa diakona sy mpiangona mahafatrapo tao amin'ny Fiangonana Loterana teo an-toerana izy hatramin'izay, saingy tsy nahafa-po azy izany. Ny tsy fitovian-kevitra lehibe nananany tamin'ny fiangonana dia ny batisan'ny zaza.

Tsy nekeny intsony ilay hevitra hoe ny famafazana rano amin'ny zazakely dia nahatonga an'io zaza io ho anisan'ny tenan'i Kristy sy ho mpandova ny fanjakan'Andriamanitra. Noho ny toe-javatra hafahafa maromaro nitranga, dia nanomboka nanatrika kilasy tao amin'ny sekolin'ny Baiboly isan-kariva iray izy. Tao anatin'ireo herinandro nanaraka, dia nisy fahazavana nipoitra tao amin'ny fanahiny, ary lasa Kristiana tena nanolo-tena izy raha nijery ny fampielezam-peo tamin'ny fahitalavitra.

Hatrany am-boalohany i Bud dia naniry mafy ny hahalala ny Tenin'Andriamanitra sy hankatò azy io. Raha nihevitra izy fa rehefa voavonjy izy dia tsy hisy olana intsony, dia diso fihevitra izy. Nisy olana iray manokana ary nipoitra. Niara-niasa tamina lehilahy iray

tsy mpino izy. Tsy nanana olana tamin'izany mihitsy izy hatramin'izay. Fa rehefa nandalo ny masonry ny ao amin'ny 2 Korintiana 6:14-18:

„Aza mety hasiana zioga tsy antonona anareo hikambanana amin'ny tsy mino. Fa inona no iraisan'ny fahamarinana sy ny fahotana? Ary inona no iombonana'ny mazava sy ny maizina? Ary inona no ifanarahan'i Kristy sy Beliala? Ary inona no iraisan'ny anjaran'ny mino sy ny tsy mino? Ary inona no ikambanan'ny tempolin'Andriamanitra amin'ny sampy? Fa isika no tempolin' Andriamanitra velona, araka ny nataon' Andriamanitra hoe: Horina eo aminy sy handeha eo aminy Aho, ary izy ho oloko. Koa mivoaha eo aminy ianareo, ka misaraha aminy, hoy Jehovah, Ary aza manendry izay zavatra tsy madio; Ary Izaho handray anareo. Ary ho Rainareo Aho, ary ianareo ho zanako-lahy sy ho zanako-vavy, hoy Jehovah Tsitoha“

Nanindrona an'i Bud foana ireo teny ireo isaky ny mamaky azy ireo izy. „Ary inona no iraisan'ny anjaran'ny mino sy ny tsy mino?“ Marina izany. Samy hafa mihitsy izy sy ilay mpiara-miasa aminy. Tsy nitovy ny soatoavina nananan' izy ireo. Tsy mbola nisy olana mihitsy ny fanao tsy ara-moraly teo aloha, fa ankehitriny dia lasa mavesatra taminy izany. Toy ny hoe nanisy zioga omby sy boriky. Tsy niara-nisintona ilay zioga sy nandroso miaraka ireo.

Fantatr'i Bud izay tokony hataony. Tokony hiala amin'ny zioga tsy mitovy izy. Ny fikojakojana fiaramanidina anefa no fivelomany. Tsy maintsy nihevitra

ny ankohonany koa izy. Tsy misy ianteheren'izy ireo raha mandao ny asany izy. Ahoana no ho fiainan'izy ireo?

Nanapa-kevitra ny hifampidinika tamin'ny anti-panahy iray tao amin'ny fivoriambe iray teo an-toerana izy aloha. Notantarainy tamin'ilay loholona ny tantara manontolo momban'ilay olana atrehiny.

Hoy ilay loholona "Tsy misy olana lehibe eto. Vidio fotsiny anjaran'ny namanao mba ho tompon'ny orinasa ianao"

„Tsy manam-bola ho amin'izany aho“

„Ary raha izay ary dia nahoana raha avelanao hividy ny anao indray izy?“

Mendrika ny hosainina lalina izany torohevitra izany. Niresaka tamin'ilay mpiaramiombon'antoka izy, nahagaga azy fa toa nanaiky ilay hevitra izy. Nampanantena izy fa handoa \$40,000 an'i Bud izy izay anjarany amin'ny orinasa. Toa io no vahaolana tsara indrindra hamahana ilay olana. Nanomboka niditra ny vola. \$200 isam-bolana ny seky voaray. Dia lasa tsindraindray ny fandoavam-bola. Taty aoriana rehefa nandoa ny seky i Bud, dia naverin'ny banky izany niaraka tamin'ny fanamarihana hoe "tsy ampy vola" izy ireo“.

Tsy nahagaga an'i Bud ny nahafantatra fa very vola tanteraka ilay mpiara-miasa taminy fahiny.

Ny fahavononan'i Bud hankatò ny baiko, „*Aza mety hasiana zioga tsy antonona anareo hikambanana amin'ny tsy mino*“ dia nandaniany teo amin'ny \$38,000 - \$40,000. Inona ary no tokony ataony? Tsy nanadino ny

teny fampanantenany anefa Andriamanitra hoe „*Ary ho Rainareo Aho*“ (2 Korintiana 6:18). Tsy ela akory dia nahita asa I Bud, asa ho an’ny kristiana iray ary naharitra 25 taona teo no niasàny tao. Rehefa nahatratra 65 taona izy ka nisotro ronono, dia naharay vola avo telo heny noho ilay volany very. Tena marina tokoa ny amin’ny Tompo fa tsy mba mpitrosa amin’ny olona Izy.

MPANDRESY ANATY FAHALEMENA⁶

David Akeman dia mpanao gazety zokiolona tao amina tranom-boky lehibe tany Hong Kong. Nalaza ho Kristiana feno fanolorantena izy ary tena nivantana tamin'ny fijoroany vavolombelona ho an'ny Tompo.

Nahasorena an'i Akeman ny lehibeny tamin'izany nohon'ny fanaratsiany an'Andriamanitra. Tsy mahay miteny mihitsy izany lehilahy izany raha tsy miteny ratsy ny Anaran'Andriamanitra. Ny resaka rehetra ataony dia misy ompa avokoa. Niezaka nihazona ihany Akeman saingy mihamitombo foana ilay fahasosorana.

Nony farany, tsy tànany intsony ilay fahatezerana. Indray andro raha mbola niteny niaraka amin'ny ompa tahaka ny fanaony ity lehilahy ity dia niteny mafy azy i Akeman, „Azafady tompoko, tsy tiako ny fomba fiteninao manonona foana ny anaran'Andriamanitra io“. Tsy tamin-pahalemena ilay teniny fa tamim-pahasosorana.

Tsy nandray izany mora koa ilay lehiben'ny birao ka namaly azy hoe „Azafady tompoko, tsy tiako *izany* fomba itenenanao ahy *izany*.“

Tamin'ny voalohany dia toa faly i David fa afaka navoakany ihany ilay zavatra tsy zakany. Nahatsapa fahafaham-po izy raha afaka nibedy ny mpiara-miasa taminy. Mety hoe nahavaha olana izany satria tsy haheno intsony izany fomba fiteny feno hadalàna izany intsony izy. Nahatsiaro maivana izy rehefa avy

namoaka ny mavesaratra tao am-pony.

Nony avy eo anefa dia tonga saina izy hoe tsy nety ny nataony. Ny zavatra nitenenany ny lehibeny dia marina saingy diso kosa ny fomba nitenenany azy. Simba ny fijoroany vavolombelona. Potika ihany koa ny fifandraisany tamin'ilay lehibeny.

Rehefa nitsotra teo ambony fandriana izy dia tonga saina ny amin'izay tokony ho ataony. Hoy izy hoe „rahampitso dia raisiko ho fahadisoako daholo ny zava-nitranga tao“. Fanafoanana ny fireharehany izany. Ho azy dia fanetrentena lehibe izany. Ary tapa-kevitra ny hanao an'izay izy ary ny ampitson'iny dia niditra tao amin'ny biraon'ny lehibeny izy.

„Hiteny aminao zavatra roa fotsiny aho dia handeha aho avy eo. Voalohany, simba ny fifandraisantsika. Tsy miresaka firy intsony isika noho ny amiko. Tsy manana ny toetra tokony ananako aho. Raisiko avokoa ny fahadisoana ary miangavy ny famelanao aho. Tsy misy fahadisoanao akory ireny na dia kely akory aza“. Gaga ilay lehibeny.

Tonga amin'ny zavatra faharoa ny resaka.

„Faharoa“, hoy i Akeman, „manomboka izao, dia omeko anao no safidy voalohany amin'ny tantara hosoratana rehetra. Raha te hanoratra tantara ianao, dia malalaka ny safidinao. Fa raha tsy hanao ianao dia ataoko izany. Mamelà ahy. Anao aloha ny tantara rehetra dia raisiko izay tsy nosafidianao“.

Izany fomba fifonana sy tsy fitiavan-tena tahaka izany dia tena tsy hita sy fantatra mihitsy raha eo amin'ny tontolon'ny fanaovan-gazety. Tsy nahateny ilay lehiben'ny birao. Nivoaka ny biraony I Akeman, ary teo

izy dia faly satria namerina amin'ny laoniny ny fifandraisan'izy ireo.

Andro vitsivitsy taorian'izay dia naheno i David fa misy mpandraharaha Kristiana iray nikarakara fotoana fisakafoanana maraina, ary hisy lehibe panantanteraka hijoro vavolombelona ny amin'ny finoany an'i Kristy mandritry izay. Raha nisalasala izy ny hiera tao amin'ilay lehiben'ny birao ka hiteny hoe „misy mpandraharaha izay nanomana fotoam-pisakafoana maraina sady hijoro vavolombelona ny amin'ny finoana an' Andriamanitra, dia handeha hanatrika an'izay aho, handeha ve ianao?“ Gaga i Akeman tamin'ny valintenin'ilay lehibe hoe „Eny ary fa andao“. Tany amin'ny faran'ny fivoriana dia nanolotra ny fiainany ho an'i Jesosy Kristy ho Tompo sy Mpamonjy izy.

Nanoratra i Akeman hoe „nitondra enta-mavesatra izy ary mbola miady amin'izany. Saingy raha tsy nandray ny dingana voalohany aho dia tsy nahazo fandresena tamin'ity lehilahy ity aho“.

Izany fifonana feno sy tsy misy tambiny tahaka ny nataon'i Akeman izany dia tsy fahita firy eto amin'ity izao tontolo izao. Zava-baovao ary tsy fahita eo amin'ny toekarena mifaninana izany hoe fandàvana ny zony rehetra izany. Fa na dia izany aza, dia izany fitondran-tena hafa sy miavaka izany no anisany hitarika ny olona maro ho ao amin'i Kristy.

Toko fahafito

TSY MISO FANOMPOANA AMBANY LOATRA IZANY⁷

Andriamanitra dia niantso an'i Doug Nichols hitondra ny Filazantsara tany Inde ka tsy niasala izy. Tena betsaka ny filàna ara-panahy tany amin'izany toerana izany. An-tapitrisany ny olona voafandrika tao anatin'ny fivavahan-diso. Nahatsapa mihitsy i Doug fa nikasika azy manokana Andriamanitra ka nanome toky azy.

Raha izay ary no marina, inona ary izao mahazo azy izao? Tsy afa-mihetsika eo amin'ny fandrianan'ny hopitaly noho ny tioberkilaozy mahazo azy. Hopitaly izay tena tsy manara-penitra. Mampanontany tena tokoa hoe nahoana io aretina io no mahazo azy. Raha salama tsara mantsy izy dia afaka nanompo ny Tompo kokoa.

Raha tokony ho resin'ny fisalasalana sy kivy lalina anefa izy dia nanapa-kevitra ny hitory ny Filazantsara tao amin'izany hopitaly izany. Nitety ireo fandriana izy mba hizara trakitra mitovy Filazantsara. Tsy tsara anefa no nandraisan'ny olona izany fihetsiny izany. Ny marary sasany aza nankahala azy mihitsy. Ny fahitan'izy ireo azy dia Amerikana mpanan-karena mibodo fandriana ao amin'ny hopitaly, nefa fandriana izay tokony nomena Indiana tompo-toerana. Nandà mafy ny trakitra izay nozarain'i Doug izy ireo.

Saingy Andriamanitra nanana fomba hafa nampiasaina an'i Doug mba hahakasika ireo olona ireo ny Vaovao Mahafaly. Indray alina, nisy marary iray izay tena malemy sy marary mafy, niezaka nitsangana avy

teo am-pandriany, ho any amin'ny trano fivoahana. Efa sahirana mafy izy nanao an'izay. Feno loto ny tenany sy ny gorodon'ilay hopitaly, niaraka amin'ny fofona maharikoriko.

Tezitra taminy sady nanompa azy ireo mpitsapo sy mpitsabo mpanampy satria tsy maintsy hanadio izany loto nataony izany. Nisy namely tehamaina azy mihitsy aza ny iray tamin'ireo. Tsy nampahazo aina ny marary tao izany zava-nitranga izany.

Ny alina manaraka an'io dia hitsangana teo ambony fandriany indray ilay marary, ho any amin'ny trano fivoahana. Saingy efa reraka sy malemy izy ka nianjera tamin'ny tany ary nitomany.

Na teo aza ny fahalemeny dia nitsangana i Doug, nampitsangana an'ilay lehilay ary nitondra azy nankany amin'ny trano fivoahana. Niandry azy hahavita ny zavatra nataony dia nitondra azy niverina teny am-pandriany.

Tamin'izany fotoana izany, dia efa nifoha avokoa ny olona rehetra ka nahita ny zava-niseho. Niova avy hatrany ny fijerin'izy ireo ilay lehilahy Amerikana. Nisy marary iray aza nanantona ny fandrianan'i Doug ka nanolotra azy dite mafana sady nangataka trakitra taminy. Nangataka ilay bokikely momban'ny Filazantsara sy ny filazantsaran'i Jaona ihany koa ireo Dokotera, mpitsabo mpanampy sy ireo vehivavy mpanadio. Nisy mihitsy aza tamin'izy ireo nanolo-tena ho an'i Kristy taorianan'izay satria hitan'izy ireo teo amin'ny fiainana feno fangorahana nananan'i Doug Nichols ny Tompo.

Izay ilay tian'ny Tompo Jesosy hambara raha nilaza

Izy fa tsy ampy ny hoe miantra olona fotsiny, satria na izao tontolo izao aza mahay manao izany. Isika dia mila manao mihoatra ary maneho an'i Kristy amin'ny alalan'ny asa sy fanehoana fitiavana tsy mitovy amin'ny fanaon'izao tontolo izao. Raha tsy mihoatra noho ny ataon'ny izao tontolo izao ny fitondrantenantsika dia tsy hisy fiantraikany amin'ireo izay very mihitsy izany.

ILAY ZANAKA LAHIN'NY SCOTLAND IZAY NAMPIREHAREHA AZY⁸

Mba hahatakaranao ny tantaran'i Eric Liddell, dia tsara ho fantatrao fa tamin'ny andron'i Ekosy, dia nanaja fatratra ny Andron'ny Tompo ny Kristiana. Nantsoin'izy ireo hoe Sabata Kristiana izany. Tsy niasa izy ireo, tsy nanao fanatanjahan-tena, fa nanatrika ny fotoam-pivavahana tamim-pahatokiana. Nikatona ny toeram-pivarotana ary naato ihany koa ny fitaterambahoaka ankoatra ny vonjy taitra. Manokana io andro io ho amin'ny fanompoam-pivavahana sy fanompoana an'i Jehovah ny mpino tamin'ny izany. Nihevitra izy ireo fa raha tia an'i Jehovah ianao dia ho tia ny androny koa.

Tamin'ny fahadimy ambin'ny folo taonany i Eric dia nandray an'i Jesosy ho Tompo sy ho Mpamonjy azy amin'ny fiainany. Na dia nafana fo tamin'ny fihazakazahana aza izy, dia ny Tompo no laharampahamehana voalohany indrindra.

Naniry ny hisolo tena ny fireneny amin'ny Lalao Olaimpika izy ary tonga taminy izany faniriany izany tamin'ny taona 1924, rehefa voafidy tamin'ny fifaninanana 100 metatra tany Paris. Faly be izy. Niova anefa izany rehefa nilaza taminy ny mpiara-miasa taminy fa andro Alahady no hatao ny hetsika.

„Tsy mety izany“, hoy izy nitaraina, "tsy mety izany"

Nitady fitoerana mangina izy ary nivavaka, ary rehefa nitsangana izy, dia tapa-kevitra ny hijoro, fa tsy anamavo

ny Tompo sy ny androny.

Rehefa fantatra izany, dia niteraka tabataba. „Nandositra ny taninao ianao, mpamadika ianao.“ Nitomany ny mpitantana ny ekipa britanika hoe: „Tsy vitanao izany.“ Namaly moramora izy hoe: „Tsy afaka mihazakazaka aho amin'ny andron'ny Tompo".

Nanjary lohatenim-baovao ny fialany. Tezitra be ny manampahefana anglisy ara-panatanjahantena. Tsy nisy indrafo ny taratasy tamin'ny fanamelohana azy ireo. Niezaka niaro azy ny sasany tamin'ireo namany, saingy tsy nisy vokany izany. Mpamadika ny fireneny no hilazana an'i Eric amin'izao.

Nandinika ny solaitrabe misy ny fandaraharam-potoana i Eric. Tsikariny fa tsy natao ny alahady ny hazakazaka 400 metatra. Tsy ny halavirana tiany indrindra izany, saingy mbola afaka nanandrana izy. Mifanohitra amin'ny politika mahazatra, nanaiky ny mpitantana. Nandresy tamin'ny fifaninana voalohany i Eric. Nihazakazaka indray izy ary nandresy. Vetivety dia teo amin'ny manasa-dalana izy, avy eo dia teo amin'ny lalao famaranana tamin'ilay noheverina ho zava-dehibe indrindra tamin'ny lalao olaimpika.

Talohan'ny hazakazaka dia nanolotra taratasy kely ho azy ilay mpanotra ekipa. Namaky i Eric hoe: „Ao amin'ny Testamenta Taloha dia misy hoe: *‘Izay manome voninahitra Ahy no homeko voninahitra’*. Mirary fahombiazana ho anao mandrakariva.“ Ny 1 Samoela 2:30, DIEM, no resahin'ny Baiboly. Nihazakazaka niaraka taminy nandritra ny hazakazaka ilay andininy.

Nilaza ny tompon'andraikitra iray izay nanome lahateny ho an'ny ekipa britanika hoe: „Ny lalao no

hany zava-dehibe eo amin'ny fiainana.“ Mety teny miantefa manokana amin'i Eric izany saingy tsy nandratra azy akory. Ho an'i Eric dia nisy zavatra hafa manan-danja kokoa.

Rehefa nanao ny sarin'ireo mpihazakazaka ho amin'ny toerana misy azy ireo, dia ratsy ny an'i Eric. Fanampin'izany, tsy azo leferina ny maripana tamin'io andro io. Tena tsy fahita firy tamin'ny Lalao Olaimpika izany.

Nilaza ny olona fa ratsy ny fomba fihazakazahan'i Eric. Nisava ny tanany, nidona tamin'ny rivotra ny totohondry, nipoitra ny lohaliny, ary nihemotra ny lohany. Nisy nampitaha azy tamin'ny kojakojan-drivotra. Fa rehefa teo amin'ny 50 metatra alohan'ny ahatongavana izy dia nanao ezaka faratampony mba hampitombo ny hafainganam-pandehany. Nanalavitra ny mpihazakazaka hafa izy, nahazo ny medaly volamena, ary nametraka firaketana an-tsoratra vaovao.

Nanoratra toy izao ny iray tamin'ireo mpanoratra tantaram-piainany: „Nalainy ny sain'ny olona antapitrisany tamin'ny fanipazana ny vintana hahazoany medaly volamena teo amin'ny 100 metatra, ny hazakazaka nankasitrahany handresena azy, satria ny foto-kevitry ny finoany kristiana no zava-dehibe kokoa. Rehefa nandresy tampoka ny 400 metatra izy, dia teo antongony ny firenena.“⁹ Nilaza ny atleta malaza iray, „tsy misy fisalasalana na dia kely aza, fa i Eric no atleta lehibe indrindra novokarin'i Skotlandy - tamin'ny alalan'ny fitaoman-dry zareo, ny ohatra nasehony ary ny fahaizany.“

Tatỳ aoriana, dia lasa misionera tany Sina izy.

Talohan'ny niaingana dia hoy izy tamin'ny anabaviny: „Jenny, Andriamanitra no niantso ahy ho any Sina; Nefa izy koa nanampy nandritra ireny azakazako ireny. Teo foana izy ary tsapako niaraka tamiko foana.“

Nalefa tany amin'ny toby fitanana i Eric, rehefa azon'ny Japoney i Sina. Henjana ny toe-javatra. Zara raha misy ny sakafo sy fitafiana ary tsy hay lazaina ny trano fivoahana. Ny toby dia namoaka faharatsiana ny amin'ny fiainana. Maro no nifamaly tao amin'ny toby, indrindra ireo vahiny tsy tao an-toerana.

Kanefa hita fa tsy tahaka ireo vahiny ireo i Eric. „Niaina ny maha-Kristiana azy izy. Aseho ho endrik'i Kristy eto amin'ny toby izy, tahaka ny naha-izy azy tamin'ireo Sinoa tao Sianchong. Ninamana amin'ny mpivaro-tena sy amin'ny mpandraharaha atao tsinontsinona izy; mitondra vainafo ho an'ny osa izy sy mampianatra ny tanora; na mafy tahaka ny inona aza ny fiainany ao dia vonona foana izy hamoy ny fananany ho an'ny hafa. Saingy mbola i Eric ihany izy, mandehandeha amin'ny akanjo maro loko vita amin'ny lambam-baravarana taloha, nanana fiainana farak'izay tsotra indrindra izy.“¹⁰

Ny iray amin'ireo voafonja, Rosiana mpivaro-tena, dia nangataka fanampiana taminy. Rehefa nanampy azy i Eric, dia nilaza izy fa izy no lehilahy voalohany nanao zavatra ho azy tsy nila takalony.

Hoy ny babo iray momba azy: „Tsy mbola nandre an'i Eric niteny ratsy momba ny olona iray aho.“ Ny iray hafa dia nijoro ho vavolombelona hoe: „I Eric no lehilahy tahaka an'i Kristy indrindra fantatro.“

Rehefa nahatsikaritra ny mpiambina japoney iray fa

tsy namaly ny antso an-taroby i Eric indray andro, dia nisy nanazava fa maty ora vitsivitsy talohan'izay izy. Nisalasala ilay mpiambina, avy eo dia niteny hoe: „Kristiana i Liddell, sa tsy izany?“ Tsy mbola niresaka tamin'i Eric izy fa tsy nahita an'i Kristy tao aminy.

Maty tao izy, tsy noho ny habibiana, fa noho ny fivontosan'ny atidoha. Ny toeram-pitsaboana dia tsy ampy fitaovana hiatrehana io olana io. Ny teny farany nataon'i Eric, izay nolazaina tamin'i Annie Buchan, mpitsabo mpanampy, dia ny hoe: „Annie, tanteraka ny fanoloran-tenako ho Azy.“

Rehefa tonga tany Glasgow ny vaovao, dia nanambara ny Evening News hoe: „Namoy zanakalahy i Skotlandy izay nireharehany isan'ora teo amin'ny fiainany.“

Nandritra ny fotoam-pandevenana dia nilaza i Arnold Bryson, iray amin'ireo misiônera zokiolona:

Omaly, nisy lehilahy iray niteny tamiko hoe: „Amin'ireo lehilahy rehetra fantatro, dia i Eric Liddell no ilay nanana ny toetra sy ny fiainany naseho miharihary ny fanahin'i Jesosy Kristy“. Ary isika rehetra izay nahazo tombontsoa nahafantatra azy tamin'ny fifandraisana akaiky rehetra dia namerina izany fitsarana izany. Inona no tsiambaratelon'ity fiainana voatokana ity sy ny hery mitaona lavitra? Ny fanoloran-tena tanteraka amin'ny sitrapon' Andriamanitra araka ny nambara tao amin'I Jesosy Kristy. Ny fiainany dia nofehezin'Andriamanitra ary nanaraka ny Tompony tamin'ny fifikirana mafy izay tsy hain'ny saina na oviana na oviana, ary tamin'ny tanjona mahery vaika ka nahatonga ny olona hahita

*ny tena zava-misy sy ny herin'ny fivavahana marina.*¹¹

Tamin'ny 1977, ny talen'ny sarimihetsika britanika David Puttnam dia nijery ny tantaran'ny fandresen'i Eric Liddell tamin'ny Lalao Olaimpika 1924. Vao avy namokatra sarimihetsika antsoina hoe *Midnight Express* i Puttnam izay mampiseho ny ratsy indrindra amin'ny natioran'ny olombelona. Sarimihetsika mampalahelo izay namela fangidiana ho azy. Lasa nalaza tao amin'ny toram-piasany izy ka somary nahakivy azy izany. Ankehitriny, nahatsapa izy fa mety ho fiovana tsara ny tantaran'i Eric. Hoy izy: „Indro ny toetra iray izay mijoro amin'ny zavatra lehibe kokoa noho ny tenany - manao an'Andriamanitra ho lohany noho ny asa izay mandalo eto an-tany.“

Izany no nahatonga ny sarimihetsika „*Chariot of Fire*“ (Fiaran'ny Afo). Nahakasika olona teo no eo izany. Ny olona manerana izao tontolo izao dia nandre momba ny tovolahy iray izay nanana ny foto-keviny izay lehibe kokoa noho ny medaly volamena amin'ny Olaimpika, atleta Skotlandy manetry tena izay nanana fandresen-dahatra mafy ary tsy nanaiky lembenana.

Nalaza be ilay sarimihetsika. Nitomany ny olona teo am-pijerena ny fomba nanomezan'Andriamanitra voninahitra ny lehilahy iray izay nanome voninahitra Azy. Rex Reed, mpitsikera film any New York, dia niantso azy io hoe „Iray amin'ireo sarimihetsika tsara indrindra natao hatramin'izay. Tonga any amin'ny lalin'ny fitenenana eran'izao tontolo izao izy io ary maneho fihetseham-po heverina ho efa lany andro amin'ny fenitra maneso ankehitriny.“

I Eric dia nihazakazaka ilay hazakazaka malaza tamin'ny 1924. Fito amby dimampolo taona taty aoriana dia nisy sarimihetsika nivoaka nanome voninahitra azy tamin'ny fomba tsy noeritreretiny mihitsy.

ILAY JENERALY NANETRY TENA¹²

Nifarana ny ady an-trano ary nandeha ny fiomanana amin'ny diabe fandresena indray any Washington. Ny jeneraly William Tecumesh Sherman no niandraikitra ny fotoana. Ny lalan'ny matso dia ho eo amin'ny lalan'ny Pennsylvania ary handalo ny Trano Fotsy. Araka ny fenitra misy dia misy jeneraly iray mitarika mitaingin-tsoavaly eo anoloan'ny fizarana nodidiana.

Nisy olana ny marainan'ny matso. Toa sahiran-tsaina ny jeneraly Sherman rehefa nanatona ny Jeneraly Oliver O. Howard. Io jeneraly io dia nanampy tamin'ny fandresena tamin'ny toby Tennessee sy Atlanta. Notendren'i Sherman hitarika ny „March to the Sea“, matso iray mankany amin'ny Ranomasina).

„Jeneraly Howard, fantatrao fa voafidy handeha eo anoloan'ny fizarana misy anao ianao.“

„Eny tompoko?“

„Eny ary, te hiangavy zavatra aminao aho.“

„Anao ny baiko, tompoko.“

„Jeneraly _____ izay nialoha anao teo amin'ny baiko dia te-hiaraka amin'ny lohan'ny diviziona taloha. Fantatro fa ianao no nibaiko nandritra ny ady farany teo. Fantatro fa Kristiana ianao ka afaka ny ho diso fanantenana.

Hiala ve ianao ary hamela ny Jeneraly _____ hanana voninahitra hitarika ny miaramila amin'ny matso?“

Talanjona vetivety ny jeneraly Howard. Efa nanantena ny hiara-mandeha amin'ireo miaramila, izay nanompo azy tamim-pahatokiana sy tamin'ny fahafoizan-tena izy. Nisy firalahina tena mafy orina niforona tamin'ny zareo niara-niaina sy niady izy ireo. Vonona ny ho faty ho azy sy ho an'ny tsirairay ireo lehilahy ireo. Very tanana izy tamin'ny fanompoana. Ankehitriny izy dia nasaina nanome ny toerany ho an'ny manam-boninahitra iray hafa izay nanao fangatahana tsy mbola nisy toy izany sy tsy ara-drariny.

Tsy ela akory fa nitraka avy hatrany ny Jeneraly Howard. Mifanaraka amin'ny tenin'ny miaramila hoe: „Ny fangatahanao no baiko“, dia nitsangana teo anoloan'ny lehiben'ny komandy izy ary nanao hoe: „Eny, tompoko. hanao izany amim-pifaliana aho. Afaka mitarika eo amin'ny lohan'ny fizarana ny Jeneraly -----“.

Nijery azy tamim-pahamaivanana sy nidera azy i Sherman, avy eo dia niteny hoe: „Howard, nino aho fa hanaiky hanao izany ianao. Ankehitriny, tiako ianao hitarika miaraka amiko ho lohan'ny tafika manontolo.“

Mifanohitra amin'ny toetran'olombelona mahazatra ny an'i Jeneraly Howard, izay naneho ny mahakristiana azy. Nianarany fa ny fanetrentena dia toetra nolovana tao amin'I Kristy. Nifanohitra tamin'ny zavatra mahazatra fahita ety amin'ny izao tontolo izao ny fahafohizana dera sy laza. Saingy nanome voninahitra azy tamin'ny fomba izay tsy ampoizina mihitsy i Sherman.

Toko fahafolo

NA SALAMA NA MARARY¹³

Robertson McQuilken dia filohan'ny Kolejy sy Semineran'ny Baiboly tany Kolombia. Anisan'ny fifaliana lehibe teo amin'ny fiainany ny nampiofana ny tanora ho tonga mpanompon'i Jesosy Kristy Tompo. Nanatratra izany tanjona izany izy ary dia niasa tsy ankijanona. Teo ambany fitarihany, ny kolejy dia nalaza ho ambony ara-panahy sy ara-pampianarana.

Tampoka teo, nanomboka namerimberina foana ny zavatra nataony i Muriel vadiny. Lasa tsy nahay namaky teny intsony izy ka natsahatra daholo ny fanompoana ampahibemaso izy. Nampahory an'i Robertson ny nijery azy "mihena tsikelikely". Farany, rehefa nanontany azy ny dokotera iray mba hitanisa ireo Filazantsara efatra ka tsy afaka nanao izany izy, dia voamarina fa voan'ny aretin'i Alzheimer izy.

Vadin'i Robertson nandritra ny taona maro izy. Raha tsy nisy azy, dia tsy ho vitany ny nanohy ny asa fitoriana izay nahavokatra. Inona no hataony? Moa ve izy handamina sy hanakarama mpikarakara marary hiaraka aminy mba hahafahany manohy ny asany any amin'ny oniversite sy seminera? Sa hametra-pialana izy mba hamerenana aminy ny sasany tamin'ireo fikarakarana natolony azy hatry ny ela?

Tsara tokoa ny fomba nanampian'ny manodidina azy. Maro ireo namana izay nijoro, nampahery, naneho fitiavana sy ny halemem-panahy kristiana tamin'i Muriel. Izany dia mba hanamaivanana an'i Robertson

ka hahafahany hanohy ny fitarihany any Kolombia.

Tsy nivoady ve anefa izy fa hiaraka amin'ny vadiny foana mandrapatongan'ny fahafatesana? Ankehitriny, mararina aretina tsy azo sitranina izy. Mazava ho azy fa afaka nanao fahagagana tao amin'i Muriel Andriamanitra, fa raha tsy izany, dia ahoana àry? Hijanona ho filoha ka hamela ny vadiny sa aharitra amin'ny voadiny àry izy?

Ka dia nitana izany voady izany izy. Niteraka alahelo sy fahatairana teo amin'ny sekoly sy ny seminera anefa izany satria niala tamin'ny asany amin'ny maha filoha azy izy ka nanapa-kevitra hikarakara ny vadiny ny amin'izao aretina mahazo azy izao. „Rehefa tonga ny fotoana dia nahatoky tamin'ny nolazaiko aho, tsy nanana heritreritra hafa intsony na dia mety hanova ny fiainanay aza ny safidiko, Tsy an-tery ary an-tsitrapo tanteraka no nisafidiako hiala ny asako sy hikarakara ny vadiko. Nandritry ny 40 taona dia nanolotena ho ahy ary nikarakara ahy tamin'ny fanoloran-tena lehibe; anjarako izao. Tena vady sy sakaiza miavaka mihitsy izy e! Na hikarakara azy mandritry ny 40 taona aza aho, tsy ho voavaliko mihitsy ny soa nataony tamiko hatrizay.,,

Nandritra ny fito ambin'ny folo taona i Robertson dia teo akaikin'i Muriel foana tamin'io aretina mahazo azy io. Hoy izy nanoratra:

„Sasakalina izao, na tsy misy dikany ho azy loatra aza, manontany tena matetika aho hoe rahoviana no hiposaka ny maraina. Na io aretany io aza dia tsy tokony hiseho aloha loatra sy hampijaly ela be. Hitako amin'ny endrik'i Muriel fa na dia ao anatin'io aretina

io aza izy dia hita amin'ny tarehiny foana ny filaminan-tsainy sy fiadanam-pony. Raha alain'i Jesosy izy, dia halahelo io endriny io mihitsy aho. Eny, misy ny fotoana mahasorena ahy izy, fa tsy matetika. Tsy misy dikany ny fahatezerako. Ary ankoatra izany, angamba efa namaly ny vavako ny Tompo mba hampitony ny fanahiko.

Indray mandeha, na izany aza, dia very tanteraka aho. Tamin'ny andro mbola nahafahan'i Muriel nijoro sy nandeha ary mbola tsy nampiasa tatin-jaza izahay, indraindray dia nisy tsy nahy. Nandohalika teo anilany aho, niezaka nanadio ny loto, raha nijanona teo akaikin'ny trano fidiovana izy, very hevitra. Mora kokoa raha tsy niziriziry tamin'ny fanampiana izy. Niha-kivy be aho. Tampoka teo, mba hampijanonana azy, dia nokapohiko tehamaina izy mba hamoha azy. Tsy tehamaina mafy ilay izy, fa taitra izy. Izaho koa dia tsy mbola nikasi-tanana azy tamin'ny fahatezerana na amin'ny fananarana na inona na inona tao anatin'ny efatra amby efapolo taona nivadianay. Tsy nalaim-panahy mihitsy, raha ny marina. Fa ankehitriny, rehefa nila ahy indrindra izy.

Nitomany aho ka nitalaho taminy mba hamela ahy na dia tsy azony tsara kokoa aza ny teniko noho izay azony lazaina. Dia nitodika tany amin'ny Tompo aho mba hilaza Aminy ny alaheloko. Nandany andro maromaro aho vao afaka niala tamin'izany. Angamba Andriamanitra no nanala ireo ranomaso ireo mba hamonoana ny afo izay mety hirehitra indray andro any.“

Noho izany, i Robertson McQuilken dia nandao ny fiadidian'ny Kolejy Baiboly sy Seminera izay nohazoniny nandritra ny roa amby roapolo taona, mba hikarakarana ny vadiny rehefa nidina tao anatin'ny fanadinoana izy.

Ny tantara dia navoaka tao amin'ny *Christianity Today*, gazety Kristiana. An-dranomaso no namakian'ny mpamaky izany. Navelany hanavao ny voadim-panambadiany ny mpivady sasany izay nahafantatra ny Tompo. Ny hafa dia namolavola fankasitrahana vaovao ny amin'ny fahamasinan'ny fanambadiana. Ny hafa indray dia nahatsapa fa nahita an'i Jesosy Tompo teo amin'ny fiainan'i Robertson McQuilken izy ireo.

Toko faharaika ambin'ny folo

KAPITENIKO

Mpampianatra sekolim-panjakana iray any Melrose, Massachusetts no nanery ny mpianany hitadidy ny „Invictus“ (Ilay tsy Resy mihitsy) nataon'i William Ernest Henley sy mitanisa izany any am-pianarana. Ity tononkalo ity dia heverina ho mahazatra amin'ny literatiora anglisy, ary nihevitra izy fa tokony ho fantatry ny mpianany izany. Manentana ny olona tsy misaina afa-tsy amin'ny fanahin'ny heriny, ny fahaleovantenany ary ny herim-pony. Ny lohatenin'ny tononkalo dia ny teny latinina hoe „Tsy resy“.

Raha ny marina, ny "Invictus" dia tsy misy finoana tanteraka. Manontany ny fisian'Andriamanitra izy io ary maneso Azy raha misy tokoa Izy. Ny mpanoratra dia mirehareha amin'ny fahaleovan-tenany. Tsy mila Andriamanitra izy mba hamaritra ny hoaviny na hilaza aminy izay tokony hatao. Mihantsy ny Tsitoha Izy.

Toy izao ilay tononkalo: Tsy Resy

Tafavoaka tao anatin'ny haizina

Toy ny anaty lavaka tsisy fiafarana

Asandratro ireo andriamanitra ambony

Nampahery ny fanahiko mba ho tony

Na mafy ny iainako

Tsy nitaraina na mandatsa-dranomaso

Tsy aiko izay miandry ahy eo

*Tsy maintsy hijoro aho fa tsy ho leo
Fahatezerana sy tomany
Fahafatesana no miandry ahy
Izay miandry ahy ao tsy ahoaka
Satria izaho hijoro fa tsy hisafoaka
Na ho sarotra aza ny lalana
Na ho maro ny sakana
Tompon'ny tenako aho
Kapitenin'ny fanahiko aho*

Niteraka olana ho an'i Edith Vail, tovovavy kristiana iray ao amin'ny kilasy ireo teny ireo. Ny fitanisana an'io tononkalo ampahibemaso io amin'ny feo avo dia fandavana ny zavatra inoany. Ho fanalam-baraka an'ilay nekeny ho Tompony sy Kapiteniny izany.

Raha ny marina, dia nihevitra izy fa ho fitenenan-dratsy ny Tompo sy Mpamonjy azy izany.

Tsy nisy afa-tsy zavatra iray ihany no tokony ataony. Nankany amin'ny mpampianatra izy ary nanazava ny toe-javatra nisy azy tamim-panajana. Sady tsy tia ady izy no tsy mpanevateva. Niezaka niady hevitra taminy ilay mpampianatra. Nohazavainy fa tsy voatery hitovy hevitra amin'ny fihetseham-pon'ilay tononkalo i Edith, tokony ho hainy fotsiny ilay tononkalo amin'ny maha literatiora lehibe azy. Tsy nisy ilana azy izany. Nametraka fitsipika hentitra i Edith. Tsy azo nifanarahana ny zavatra inoany.

Tsapan'ilay mpampianatra fa tena nisy ny tsy fankatoavana. Nitatitra an'i Edith tany amin'ny mpitantana ny sekoly izy saingy tsy nijanona teo. Nisy

nitatitra izany tamin'ny gazety teny an-toerana, ary vetivety dia lasa lohatenim-baovao Malaza izany. Eo amin'ny pejy voalohany: mpianatra izay mafy loha tsy nety nankatò ny mpampianatra azy. Nampitahaina tamin'ny Vavolombelon'i Jehovah izay tsy nety niankohoka eo anatrehan'ny sainam-pirenena i Edith. Mazava ho azy fa anisan'ny antokom-pivavahana mpikomy mety ho anti-Amerikana izy.

Nivavaka mafy ho an'i Edith ny Kristiana manerana ny faritra. Avy eo dia nisy mpino tonga nanavotra azy tamin'ny fanoloran-kevitra tsara. Nolazainy taminy fa misy dikan-tenin'ny tononkalon'i Henley nataon'i Dorothy Day ho an'ny Kristiana . Angamba havelan'ilay mpampianatra hanonona azy io ho solon'ilay manafintohina izy. Ary izany no nitranga. Nalain'i Edith ilay dikan-teny kristiana ary nasehony an'ilay mpampianatra. Gaga be izy fa nanaiky ilay pampianatra.

Nijoro teo anoloan'ny kilasy i Edith ary nitanisa izao manaraka izao:

*Esory ny fahazavana izay mampitolagaga ahy,
Mamirapiratra toy ny masoandro manomboka
amin'ny tsato-kazo*

*Misaotra an'ilay Andriamanitra fantatro aho
Ho an'i Kristy, Mpandresy ny fanahiko.*

*Satria ny fibaikoan'ny zava-misy Azy
Tsy hitsoaka na hitomany aho
Eo ambanin'io fitsipika io izay antsoin'ny lehilahy hoe
kisendrasendra
Ny lohako dia miondrika am-pifaliana.*

*Eo an-dafin'ity toeran'ny fahotana sy ny ranomaso ity
Ny fiainana miaraka Aminy! Ary ny fanampiany
Izany dia, manafohana ny loza ateraky ny taona,
Mitahiry, ary miaro ahy tsy hatahotra*

*Tsy matahotra aho na dia tery aza ny vavahady
nesoriny tamin'ny famaizana ilay horonana;
Kristy no Tompon'ny anjarako
Kristy no kapitenin'ny fanahiko*

Nataon'Andriamanitra hiderana Azy ny fahatezeran'ny olona. Nomeny rariny ny tanora mpino be herim-po iray izay vonona ny hiharan'ny fanaratsiana am-bava noho ny tsy fivadihany amin'i Kristy. Nitondra olona betsaka nifanatrika tamin'i Kristy tsy azo ihodivirana izy.

Mitaky hazondamosina ny maha-marina an'i Jesosy rehefa toa manohitra anao izao tontolo izao. Anisan' ireo nanana izay nilaina i Edith Vail.

Toko faharoa ambin'ny folo

NAMAN'IZAY NAHILIKA AO AMIN'NY FIARAHAMONINA

Jack Wyrzten dia mpanorina sy talen'ny Toby Word of Live Camp ao Schroon Lake, any New York. Rehefa main-tany dia manao hetsika isan-karazany io toby io: kaoferansa ara-baiboly, lasin'ny tanora, ary hetsika hafa natao hitarihana ireo izay tsy mbola manana an'I Kristy, hampiorina ireo mpino amin'ny finoany, ary manamafy orina ny fiangonana kristiana teo an-toerana. Mpitarika ara-panahy i Jack ary mpino tena mavitrika amin'ny fanompoany. Anisan'izany ny fitantanana ny toby, fanomanana ireo fampianaranaa, fandraisana sy fihaonana amin'ireo vahiny, ary indrindra koa ireo asa rehetra atao mba hampilamina tsara ny fizotran'ny lasy.

Nandritra ny lasy iray dia nisy Kristiana kilemaina iray tonga nanatrika ny fihaonamben'ny olon-dehibe. Tena tsikaritra izany fahasembanany izany rehefa tao amin'ny efitrano fisakafoana. Talohan'ny nanombohan'ny sakafo, dia nisy olona tsy maintsy naka gazety, natao teo amin'ny tendany hatrany amin'ny fe-ny. Hita fa rehefa mihinana izy dia tsy afaka nitelina afa-tsy kely fotsiny. Satria simba ny hozatry ny vavany, ny sakafo sisa dia very eo amin'ilay gazety. Tsy nisy azony natao intsony. Izay no kilemany. Kanefa izany olona manana kilema izany dia tena nankafy ny Tenin'Andriamanitra ary naniry ny hanatrika izay fihaonambe hahafahany mandre ny Tenin'Andriamanitra.

Ireo hafa dia nanalavitra ny nipetraka teo amin'ny latabatra iray hafa. Mazava ho azy, tena sarotra ny haka

tsirony ny sakafo oanina raha eo akaikiny no mihinana. Ny sasany nandà tsy hiara-hipetraka aminy, ny hafa nalaina ihinana mihitsy aza.

Noho ny andraikiny dia zara raha tonga ara-potoana ny toerana fisakafoana i Jack. Matetika dia efa nanomboka nisakafo ny vahiny, ary efa mikorana ny olona.

Rehefa hitan'ny olona fa tonga ihany izy, dia niantso azy hipetraka eo amin'ny latabany.

Tsy nanao izany mihitsy anefa i Jack. Nandeha teo amin'ny latabatra nisy an'ilay rahalahy voahilika nisakafo irery izy. Izany no ho nataon'i Jesosy Tompo. Fijoroana sy fananarana izay tsara indrindra ny fihetsika nasehon'i Jack. Tamin'ny fitondran-tenany, dia nampahatsiahy ny hafa izy fa lehibe ho an'i Jesosy kokoa ireo sahirana, marary ary kely. Mpamonjy be fiantrana Jesosy sady be fanetren-tena — ary antsoina koa isika mba hanetry tena. Tsy tokony hikatsaka ny fahasoavan'ny olona ambony isika (Rom. 12:16) fa hifanerasera amin'ny olona ambany.

Noraisin'ny olona ho mariky ny fahambonian'ny sata misy azy ny hoe nipetraka teo amin'ny latabany i Jack. Na izany aza, dia olo-malaza tamin'ny radio izy, evanjelista fanta-daza, ary talen'ny Word of Live Camp, fikambanana kristiana iray nitombo. Tena zava-dehibe ho an'ireo olona ireo ny nitantarany namany manodidina fa nahalala an'i Jack Wyrzten izy ireo. Satria i Jack dia ilay lehilahin'Andriamanitra izay nanome lanja bebe kokoa olona sahirana tao amin'ny toeram-pisakafoanana.

Toko fahatelo ambin'ny folo

MAMALY SOA NY RATSY¹⁴

Mety halaim-panahy ianao hieritreritra avy amin'ilay anarana hoe Cubas fa Kiobàna izy. Saingy tsy izay izy. Honduriana i Oscar Cubas, nanompo an'i Jehovah tany ampitan'ny sisin-tany tany Nikaragoà. Izy no firenena voalohany noderaina tamin'ny fanompoam-pivavahana ho an'ny Tompo avy tamin'ireo fivoriambe tany Honduras. Nampiasa azy ny Tompo mba handamina ny fivoriamben'ny Testamenta Vaovao tao amin'ny vohitra iray antsoina hoe Tauquil.

Oscar dia tsy nianatra, tahaka ny Kristiana tsotra. Anisan'ny zava-bitany lehibe indrindra ny nananany finoana lalina ny Tenin'Andriamanitra sy ny faniriana lalina hizara ny Teny amin'ny hafa. Midika izany fa nanetry tena, nanam-paharetana, be fitiavana ary tsara fanahy izy.

Ny tanànan'i Tauquil anefa dia akanin'ny kominista. Ny fiaraha-miory sy ny tsy fivadihan'ny olona dia niaraka tamin'ny Sandinistas. Saingy rehefa nihamaro ny olona nanantona an'I Kristy ary nitombo ny fiangonana, dia nihena ny fifehezan'ny kominista ny vahoaka. Satria nirotsaka tamin'ny politika ny mpino, fa tsy nanao izany. Noho ny maha fanasina sy fahazavana azy ireo ihany no nanomboka nisy vokany tsara ny fitaomana ara-pitondrantena sy ara-panahy nananany.

Rehefa afaka kelikely, dia niatrika olana i Oscar- ilay karazana izay mampifaly ny mpanompon'ny Tompo

marina rehetra. Rehefa nitombo ny asa, dia nila trano ny fiangonana. Ny tranon'ny mpino kely ka tsy afaka nandray ireo fiaraha-mivavaka. Ka dia nividy tany ny fiangonana, ka ny antsasany no misy ny trano fiangonana ary ny antsasany kosa hisy nytrano ho an'ny Oscar sy ny fianakaviany.

Tamin'izany fotoana izany dia tsy tonga saina ny Kristiana fa ny fananany dia mifanakaiky amin'ny tanin'ny iray amin'ireo kominista lehiben'ny tanàna, Santos. tao Tauquil. Tena tsy nifankahazo tamin'ireo Kristiana mihitsy izy. Tsy isalasalana fa ny antoni' izany dia noho ny tsy fananan'ny kominista fahefana firy intsony tamin'ireo Kristiana tao Tauquil. Noho izany dia nanomboka nanenjika an'i Oscar izy. Indray mandeha aza dia nahomby tamin'ny fampidirana azy am-ponja noho ny fiampangana tsy misy dikany hoe nanapaka hazo maty izy. Rehefa nanadihady ny manampahefana ary nahatsapa fa tena mahatsikaiky ilay fiampangana, dia namoaka an'i Oscar izy ireo.

Niezaka namaly faty ve i Oscar? Nanameloka ny mpiara-belona taminy ve izy? Niaro tena ve izy? Tsia, tamin'ny fampijaliana rehetra niaretany, dia nanahaka an'i Kristy izy. Nampitolagaga ny mponina tamin'ny fitondran-tenany ivelan'izao tontolo izao izy.

Rehefa vita ny trano fiangonana dia nanomboka nanorina ny tranony i Oscar. Teo ampitan'ny fefy teo amin'ny tranon'i Santos ilay izy. Ny lakozia no efitranon'ilay trano akaikin'ny tranon'i Santos. Aha! Izany no nanome fahafahana ilay mpiara-monina tsy faly hanao ny ratsy indrindra. Nanamboatra toeram-pivoahana vaovao an-kalamanjana teo akaikin'ny fefy

izy, izay hidiran'ny fofona maimbo ao an-dakozia an'i Kioba, ampy hanimba ny sakafo rehetra.

Tsy niteny na inona na inona i Oscar. Tamin'ny hatsaram-panahy sy fanajana foana no niarahabany an'i Santos. Tsy nisy nieritreritra ny hamaly faty. Tamin'ny finoany tsotra no ninoany fa an'Andriamanitra ny ady. Nionona tamin'ny nijanonany sy nahita ny famonjen'ny Tompo izy.

Tsy tena nanaraka fenitra araka ny asan'ny injeniera mahay anefa ilay toeram-pivoahana. Indray andro, rehefa nampiasa azy i Santos, dia nirodana ny rindrina rehetra. Eto dia azontsika sary an-tsaina tsara an'ny ity zava-nitranga tsy mahafinaritra ity! Tsapan'ilay lehilahy afa-baraka fa niady tamin'Andriamanitra izy ary resy mafy izy. Sahala ny nahazo an'i Saoly avy any Tarsosy. Azo antoka fa tsy naniry ny hiverenan'izany andro izany izy.

Koa tonga amin'ny vaovao tsara isika izao. Nahafinaritra ny fiafaran'ilay tantara ratsy. Io no fomba nitondrana an'i Santos ho eo amin'i Kristy. Hoy ilay nizara ity tantara ity taminay: „Ny zava-mahagaga dia ny nanoloran'i Santos ny tenany manontolo ho an'ny Tompo. Efa rahalahy Kristiana mahafoy tena amin'ny fiarahana feno ao amin'ny fiangonana kely izy izao ary mazoto manampy ny hafa“.

Hoy ny mpanao Salamo: „*Fa sitrak'i Jehovah ny olony.*“ (Salamo 149:4). Mora ny mahita ny fomba ahazoany fahafinaretana amin'ny lehilahy toa an'i Oscar Cubas manao soa. Naleony niaritra tsy nety ntoy izay nijoro hiaro ny zony. Nivavaka ho an'izay nanenjika azy izy ary namela ny Tompo hanao ny ambiny. Tsy namaly faty izy.

Rehefa nilaza izany isika dia hanontany tena hoe inona no tsy tokony hivadihan'ny Kristiana. Ny antony dia very ny fahatokisantsika amin'ny maha-fiarahamonina hafa antsika raha toa ka mitondra tena mitovy amin'ny olona hafa isika. Ampahany amin'ny fijoroantsika ho vavolombelona momba an'i Kristy sy ny fahasoavany mahavonjy dia toe-tsaina feno fahalemam-panahy. Raha lazaina amin'ny teny hafa, ny iraka manontolon'ny fiangonana, ny fijoroana ho vavolombelon'ny filazantsara, dia voakitika raha toa ka milefitra amin'ny valifaty na fanaovan-dratsy ny Kristiana.¹⁵

Toko fahefatra ambin'ny folo

NANOLOTRA NY TAKOLANY ILANY IZY¹⁶

Tantara iray afaka tsaroina raha toa misy ady ka voantso hanao miaramila ny lehilahy sy ny vehivavy. Toe-javatra miseho matetika izy io ka tsy tena fantatra ny tena nipoiran'io hoe oviana sy taiza.

Dr. J Stuart Holden, mpitory teny britanika, dia nitantara izany. Azo lazaina hoe marina ilay nolazainy satria nisy olona iray tamin'ireo mpihaino nanambara fa nisy olona fantany tena nanatri-maso tamin'io.

Tamin'ny faran'ny Ady Lehibe Faharoa, dia nifanena tamin'ny lehiben'ny miaramila britanika iray tany Ejipta i Holden, izay Kristiana niavaka. Rehefa nanontany azy i Holden hoe ahoana no nahatonga azy hino an'i Jesosy Tompo, dia nanazava ilay lehibe fa talohan'ny nahatongavany tany Ejipta, dia nipetraka tany Malta izy. Nisy olon-tsotra tao amin'ny orinasany, izay mpino tsy menatra nitory tamin'ireo lehilahy hafa. Faly izy ireo nanorisory azy, nefa toa tsy nahasosotra azy mihitsy izany.

Hoy ilay lehiben'ny miaramila: „Indray alina dia tonga tao amin'ny toby izahay rehetra, lena be noho ny orana, ary reraka be. Talohan'ny namonjena ny fandriany, dia nandohalika ity olona nolazaina fa ratsy ity ary nivavaka. Azoko antoka fa navelako izy! Feno fotaka ny kiraroko, ka nokapohiko tamin'ny takolany. Avy eo dia noraisiko ny baoty iray ary natsipiko teo amin'ny ilany indray; fa tsy nitsahatra nivavaka izy.“

„Ny ampitso maraina“, hoy ilay lehibe nanohy „Hitako teo anilan'ny fandrianako ireo baoty ireo, voadio tsara. Izany no valin-tenin'ilay olon-tsotra tamin'ny habibiana nataoko. Nanohina ny foko izany. Tamin'io andro io ihany aho no voavonjy.“

Ny fihetsiky ny olon-tsotra tamin'ny fanenjehan'ilay miaramila dia fanehoana mazava ny tenin'ny Mpamonjy hoe: „*Raha misy mamely ny takolakao anankiray, dia atolory azy koa ny anankiray*“ (Lio. 6:29). Tsy nanaraka foana ny Tompony izy.

Te-hampitandrina ihany aho. Tsy tokony hihevitra isika fa ny fanararaotana ara-batana dia manaraka foana ny fijoroana ho vavolombelona mivaivay momba an'i Kristy ao amin'ny tafika. Matetika aho no mihevitra fa ny lehilahy sy vehivavy eto amin'izao tontolo izao dia manaja ny mpino izay manana finoana sady miazona mafy izany finoany izany. Na dia misy miaramila aza manafintohina ny Kristiana iray, ny hafa tsy mpino dia matetika no tonga hiaro azy. Ny Tompo dia manao ny rivotra ho sahaza ny zanak'ondry vao nohetezana. Tsy manome antsika mihoatra noho izay zakantsika Izy amin'ny fotoana rehetra.

Toko fahadimy ambin'ny folo

NY AFO MAFANA INDRINDRA

Ao amin'ny bokiny hoe „Ho amin'ny Fahasoavana mankany amin'ny Voninahitra“¹⁷, i Murdoch Campbell dia mitantara ny amin'ny mpanompo araka an'Andriamanitra any avaratr'i Ekosy, izay tsy nitovy ny fifandraisany tamin'i Jehovah sy ny an'ny vadiny. Toa tsy nitovy ny fitiavany an'i Jehovah sy ny Teniny. Raha nipetraka teo akaikin'ny afo izy, namaky Baiboly, dia niditra tao amin'ny efitrano tamin'ny hatezerana ny vadiny. Noraisiny teny an-tanany ilay Boky ary natsipiny tao anaty afo.

Ahoana no tokony hataon'ny Kristiana iray manoloana ny gafy sy ny fahatezerana toy izany? Tokony hananatra azy ve izy noho ny fitondran-tena ratsy toy izany? Sa tokony hampiasa izany ho fotoana hanehoana ny toetsain'i Kristy?

Nisafidy ilay faharoa izy. Nijery azy izy ary nilaza tamim-pahatsorana hoe: „Tsy mbola nipetraka teo akaikin'ny afo mafana kokoa aho.“

Ity misy fanoharana manasokajy ny ohabolana manao hoe: „*Ny famaliana mora dia mampianina ny fahatezerana mafy*“ (Oha. 15:1). Nanoratra Andriamatoa Campbell, "Valin-teny nampihemotra ny fahatezerany izany ary nanamarika ny fiandohan'ny fiainana vaovao sy feno fahasoavana. Ny Jezebelany dia nanjary Lydia. Ny tsilo dia lasa lilia".

Tsy maintsy ampiana haingana anefa izany mba hahatanteraka ny sary. Ny vehivavy kristiana no

iharan'ny herisetra matetika noho ny mpanafika.

Ohatra i Linda¹⁸. Talohan'ny nahavoavonjy azy dia nanambady lehilahy iray antsoina hoe Tony izy. Noheveriny fa tsara tarehy sy mahafinaritra izy.

Rehefa teraka anefa ny zanak'izy ireo voalohany ka lasa mpino, dia fantany fa tsy arak'izay nieritreretany azy i Tony. Tsy tokony hitsara ny bika aman'endriny izy. Tsy mahazaka miasa izy ary tena tsy tompon' andraikitra. Mpimamo sy naditra vehivavy. Indraindray izy dia miala volana maromaro ny tokantranony, avy eo miverina ao indray izy toy ny hoe tsy nisy na inona na inona, ary niara-nipetraka tamin'i Linda vadiny indray. Rehefa teraka ny zaza manaraka dia niainga indray izy, namela an'i Linda hamelona ny ao an-trano.

Amin'ny maha-vady tia an'Andriamanitra azy, i Linda dia niezaka ny hanaraka ny ohatra voalaza ao amin'ny 1 Petera 3:1-2 manao hoe:

*Ary toy izany koa, ianareo vehivavy, maneke ny vadinareo, mba ho voataonan'ny fitondran-
tenan'ny vavy izy, na dia tsy amin'ny teny aza (raha tãhiny misy tsy manaiky ny teny), rehefa hitany ny fahadiovan'ny fitondran-tenanareo amin'ny fahatahorana.*

Raha tokony hamaly faty na hanenina i Linda, dia niezaka hatrany izy naneho toetra mendrika sy fanajana ny vadiny; toetra tsy fahita eto amin'izao fiainantsika izao ny nasehony. Betsaka ny boky soratana momban'izany hoe vehivavy mankato ny torohevitr'i Petera sy niaina mba hahita ny vadiny tamin'i Kristy.

Toko fahenina ambin'ny folo

TIAVA NY FAHAVALONAO

Tsy isalasalana ny nilazan'i Jesosy hoe: „*Tiava ny fahavalonareo!*“ (Lio. 6:27), fa ara-bakiteny ve no tiany holazaina? Sa nitazona izany ho toy ny baiko tokony hiezahantsika fotsiny? Tsy mety amin'ny saintsika ny mitia ny fahavalo. Nahoana isika no tokony hiombom-po aminy, na dia hampitombo ny fankahalany antsika izany? Sarotra ho antsika ny mitia izay mankahala antsika. Koa amin'ny famakiana ity didin'ny Tompontsika ity dia ndeha ho azavaintsika izany.

Fantantsika, ary reketintsika ao am-po fa tian'i Jesosy Tompo ny Teniny. Izay adinontsika fa rehefa mandidy zavatra Izy, dia omeny hery hankatò izany didy izany isika. Raha ny maha olona dia tsy possible ny mitia ny fahavalontsika. Marina izany. Fa amin'ny fiainana maha-Kristiana dia ny herin'ny Fanahy Masina mitoetra ao anatintsika no hahazoana miaina an'izany.

Ny fahazarantsika dia ny manalefaka ny mahasabatra roa lela maranitra ny Tenin'Andriamanitra rehefa hitantsika fa misy olon-kafa mankato ny Teniny. Betsaka ny andalan-tSoratra Masina izay azo kokoa ny dikany rehefa hita iainana. Tsy afaka hifandahatra amin'ny zavatra hita maso isika. Asehoy ahy ny kristiana iray izay tena tia ny fahavalony dia ho resy lahatra aho.

Izany no nitranga tamiko. Hitako tao amin'ny fiainan'ny olombelona ny Lioka 6:27. Teo amin'ny fiainan'ny lehilahy iray antsoina hoe Theo McCully. Izy no rain'i Ed McCully, iray amin'ireo maritiora dimy teto

Ekoatera, ary filohan'ny filankevi-pitantanan'ny Sekoly Ara-baiboly izay naha mpitantana ahy.

Indray alina dia nihaona izahay sy izy mba hiresaka momba ny raharaham-pianarana sasany amin'izao fotoana izao sy ny fanapahan-kevitra sasantsasany natrehanay. Tsy nilaza tamiko mihitsy i Mr McCully izay tokony hatao. Hoy foana izy: „Andao hivavaka momba izany,.. Koa amin'ny fiafaran'ny hariva, nandohalika izahay ary nivavaka momba ny sekoly.

Rehefa nadiva hifarana ny vavaka nataony, dia lasa nianatsimo lasa any amin'ny Reniranon'i Curacay any Ekoatera ny sainy, izay nisy Indianana nandefona ny zanany misionera. Zanaka lafatra i Ed. Nilaza tamiko ny rainy fa lehilahy lafatra sy nankatoa ny ray aman-dreniny i Ed. Nivavaka i Theo hoe: „Tompo ô, avelao aho ho ela velona mba hahitako ireo olona voavonjy izay namono ny zanakay lahy, mba ho afaka hanamaivana ny tenako aho ary lazao aminy fa tiako izy ireo, satria tia an'i Kristy izy ireo.“

Rehefa nitsangana izahay, dia nirotsaka teo amin'ny takolany ny ranomaso. Fotoana mamy tsy azo averina intsony izany. Indro ny lehilahy iray izay tena tia ireo namono ny zanany malalany, zanakalahy nandao ny ray aman-dreny mba hitondra ny filazantsara. ho an'ny Waorani Indiana.

Tsy mahagaga raha vavaka tonga teo amin'ny seza fiandrianan'Andriamanitra ilay izy. Nifandray soa aman-tsara tamin'ny Waoranis ireo misionera tamin'ny farany ary afaka nitarika ny mpamono olona maro ho eo amin'i Kristy. Voavaly ny vavak'i Theo. Nankany Ekoatera izy, namihina tamim-pitiavana ireo mpino

vaovao, ary nilaza tamin'izy ireo fa tiany izy ireo satria ny Mpamonjy azy koa no Mpamonjy azy ireo.

Eny, izay tokoa no tian'i Jesosy holazaina ny amin'ny Teniny. Tokony ho tia ny fahavalontsika isika. Rehefa manao izany isika dia hisy fiantraikany amin'izao tontolo izao. Asehontsika amin'ny mpino hafa ny fomba azo ampiharina hanatanterahana izany didy izany. Fanehoana ny toetran'i Jesosy Tompo. Tia antsika Izy, fahavalony, kanefa vonona ho faty ho antsika izy.

Toko fahafito ambin'ny folo

NY FAMELAN-KELOKA DIA ARAKA AN'ANDRIAMANITRA¹⁹

Fianakaviana tena tia an'Andriamanitra ny Ten Booms. Tany Holland izy ireo no nipetraka. Nandritry ny Ady Lehibe Faharoa dia toerana azo antoka niafenan'ireo Jiosy nenjehin'ireo Nazis ny fonenan'izy reo. Raha tratra kosa ireo Jiosy dia tonga dia nalefa avy hatrany any amin'ireo toby fitanàna, fampijaliana tsy misy ohatran'izany ary matetika dia miafara amin'ny fahafatesana mihitsy aza. Ny manafina ireo Jiosy ihany koa dia mahatafiditra any amin'izany toby figadràna izany.

Taorian'ny nahombiazan'ny fialofana tamin'ny Jiosy nandritra ny fotoana ela, dia tratra ny Ten Booms. Nentina tao amin'ny tobin'i Ravenbruck ny raim-pianakaviana sy ny zanany roa vavy, Corrie sy Betsie, toerana feno habibiana sy fampijaliana tsy hay lazaina. Ny niafarany moa dia maty ny rain'i Corrie sy i Betsie. Tafavoaka velona kosa i Corrie ary navotsotra rehefa vita ny ady.

Taorian'ny nanambarana ny fandriampahalemana, dia nandeha tany Alemaina i Corrie ary nanao lahateny indray alina tao amin'ny efitrano ambanin'ny trano iray tao amin'ny trano fiangonana iray. Anisan'ny zavatra hafa noresahiny ny amin'ny fahagagana hoe rehefa miaiky ny fahotantsika isika, dia manala ireo fahotantsika any amin'ny ranomasina lalina indrindra ny Tompo ary manangana famantarana milaza hoe „Aza

manjono azy intsony“.

Tamin'ny fiafaran'ny fotoam-pivavahana dia nivoaka tamim-pahanginana ny olona, saingy nisy lehilahy iray nandeha nidina teo anoloana izay nijoroan'i Corrie. Nanao fanamiana manga izy ary nitana satroka misy karandohany sy taolan-damosina. Nahafantatra azy i Corrie. Mpiambina tao Ravensbruck izy.

Rehefa tonga teo amin'i Corrie izy, dia nihazona ny tanany ary niteny hoe: „Tena tsara ny hafatrao teo ramatoakely. Tena mahafinaritra ny mahafantatra fa, araka ny voalazanao, ny otantsika rehetra dia any amin'ny ranomasina lalina indrindra.“

Nitamberina teo anoloany ny fahatsiarovana ny habibiana nataony ary nangorintsana ny vatany.

„Niresaka an'i Ravensbruck ianao“, hoy izy nanohy ny teniny. „Mpiambina tao aho. Saingy nanomboka tamin'izay fotoana izay dia lasa Kristiana aho. Fantatro fa namela ahy Andriamanitra noho ny habibiana nataoko tao, fa mba te handre avy amin'ny molotrao koa aho, ramatoakely, hamela ahy ve ianao?“

Mety ho nangidy sy tsy namela heloka ny fihetsik'izy ireo izy. Azony natao ny nitantara ny habibiana natao tamin'ny Jiosy sy ny fitondran-tena tsy mendrika nataon'ny fianakaviany mandra-pivadika ho asidra solifara ny rano namonoana azy ireo.

Nijoro teo i Corrie tsy nihetsika. Toy ny ora maro, segondra vitsy monja, vao namaly. Farany, dia afaka namoaka ny tanany tao amin'ny paosin'ny palitaony izy ary nandray ny tanan'ilay mpiambina taloha." Andriamanitra efa namela ahy, ahoana no tsy hamelako heloka anao? Hamela anao aho, amin'ny foko rehetra“.

„Naharitra fotoana elaela izy ireo, dia nifamihina ny tanany, ny mpiambina taloha sy ny mpifatotra taloha, dia tonga iray ao amin'i Kristy ankehitriny.“

Isaky ny mieritreritra ny fitondran-tena tahaka an'i Kristy aho, dia tsy maintsy mandeha any amin'ny fianakaviana Ten Boom ny saiko. Ny alahelo toy izany, ny fijaliana, ny fanalam-baraka toy izany. Na izany aza, tao anatin'izany rehetra izany, dia nanana ny sain'i Kristy izy ireo - nihevitra ny hafa, fa tsy ny tenany. Tsy nivadika tamin'Andriamanitra izy ireo, ary tsy nitaraina tamin'Andriamanitra. Tamin'ny alalan'izany rehetra izany, dia nijoro ho vavolombelona momba ny fitiavana sy ny fahasoavan'i Jesosy Tompo izy ireo ary namela ny helok'ireo izay nampijaly azy ireo nandritra ny fotoana fanenjehana ireo Jiosy tamin'ny fotoanan'ny Nazia.

NY HALAFON'NY FIAVANANA 20

Ny tena fifalian'i bebe Phillips dia ny nahafahany niaraka niaina tamin'ny zanany roalahy sy ny vinantony avy. Mpino kristiana avokoa izy ireo. Ilay lahimatoa, Scott sy Sarah vadiny, dia nipetraka tao amin'ny tanàna iray tamin'i Bebe ary nitsidika azy tsy tapaka, nanao izay hahazoana antoka fa nisakafo tsara izy ary afaka nikarakara ny tranony. Ilay zanany lahy faharoa koa, Ron sy Rose vadiny dia afaka nitsidika tsy tapaka ihany koa na dia nipetraka tany amin'ny roapolo kilaometatra aza. Samy nanana toerana tsara izy mirahalahy ary azo lazaina fa milamina tsara ara-bola. Miaraka mankalaza ny Krismasy sy ny taom-baovao izy ireo ary matetika koa miara-misakafo.

Matin'ny aretim-po tampoka i Bebe avy eo. Hitan'izy ireo nipetraka teo amin'ny sezany mihozongozona izy, miaraka amin'ny Baiboly misokatra teo am-pofaany.

Tsy mba nahafoy io tranony io izy. Na tsotsotra ilay trano dia tao no nitaizany sy ny vadiny ireo zanany. Nanana tahiry vitsivitsy izy, toa ny AT&t, General Electric, ary General Motors. Nanana tahiry teo amin'ny 10 000 dolara teo izy sy ireo vakoka notehiriziny, kaopy vita amin'ny taolana avy any Sina. Tsy namela hafatra farany ny amin'ny izay tiany atao na Boky mirakitra fizaram-panana izy, nihevitra fa ho afaka hizara zavatra amim-pihavanana ireo zanany roalahy.

Tsy izany anefa no nitranga. Niova ho tia tena tampoka i Rose. Nihevitra i Ron fa tsy manana safidy

hafa afa-tsy ny manaraka izay ataon'ny vadiny. Ho azy dia ny mitandro ny fihavanana no zava-dehibe na inona na inona vidiny. Fianakaviana iray niaina tamimpifaliana nandritra ny taona maro saingy izao nefa dia hampisarahan'ny fitiavam-bola. Nanjary niteraka resabe ny zavatra tsy misy dikany toy ny kaopy vita amin'ny taolana. Nanao izay ho afany i Scott sy Sarah mba ho tsara fanahy, saingy fankahalana no setriny izany.

Raha nivavaka mafy i Scott sy Saraha mba hahazoany vahaolana milamina, dia nahatsiaro ny tantaran'i Abrama sy Lota i Scott. Rehefa niala tany Egipta izy roa lahy ka tonga tany Kanana, dia hitany fa tsy ampy ny ahitra ho an'ny omby aman'ondriny. Niady ny mpiandry omby. Mafy ny toe-draharaha. Ary hoy Abrama tamin'i Lota:

„Aoka re mba tsy hisy ady amintsika roa lahy, na amin'ny mpiandry ombiko sy ny mpiandry ombinao, fa mpirahalalahy isika. Moa tsy eo anoloanao va ny tany rehetra? Masina ianao, aoka hisaraka amiko ianao; raha hianavaratra ianao. dia hianatsimo aho; fa raha hianatsimo ianao, dia hianavaratra kosa aho“. (Gen. 13:8-9)

Nofidin'i Lota ny tany lemaka amoron'i Jordana, izay feno ahitra, ka nonina tao an-tanànan'i Sodoma izy. Nifidy ny tany Kanana kosa i Abrama.

Rehefa nizara izany tamin'i Sarah i Scott dia nandray fanapahan-kevitra lehibe izy ireo. Namela an'i Ron sy Rose haka ny tany manontolo izy ireo raha izay no tiany. Ny fitandroana ny firaisan-kina no zava-dehibe

kokoa noho ny isian'ny ady amin'ny zavatra ara-materialy.

Gaga i Ron sy Rose. Satria tsy nampoizin'izy ireo mihitsy izany, dia menatra loatra izy ireo haka ny zava-drehetra. Afa-po i Rose tamin'ny nakàny firavaka akanjo sy ireo karazan-javatra tsy dia misy dikany. Avy eo izy ireo dia nanolotra soso-kevitra ny amin'ny izaràna mitovy ny ambiny. Vahaolana am-pilaminana isorohana ny fisarahan' ny fianakaviana izany.

Tsy izany foana anefa no mitranga. Marina matetika ity fomba fitenenana ity hoe: „Rehefa misy taratasy fizarana lova, dia tonga ny havana hitaky ny anjarany.“

Na ny olona tsotra sy tia filaminana aza dia mety hamotika sy handrava fihavanana noho ny zava-poana sy tsy misy dikany.

Ny fihevitry'Andriamanitra no tsara indrindra. Nanankarena i Abrahama tamin'ny namelany an'i Lota hisafidy. Nampahantrain'i Lota ny tenany tamin'ny fisafidianana tany teny akaikin'i Sodoma na dia lemaka sy maitso aza.

Toko fahasivy ambin'ny folo

MIARITRA HENATRA SY FANDRORANA

Mpitarika antokom-pihira tao amin'ny Fiangonana nisy azy i Dick Faulkner. Fiangonana izay nizara ny Testamenta Vaovao. Tonga tao amin'ny Nosy Patmo any amin'ny Ranomasina Égée izy ireo. Nentin'ny mpitari-dalana azy ireo tao amin'ilay zohy izay voalaza fa nanoratan'ny apostoly Jaona ny bokin'ny Apokalypsy. Rehefa tonga izy ireo, dia niakatra teo amin'ny tehezankavoana teo akaiky teo izay nisy hafatra momba ny nanagadran'ny Emperora Domitien an'i Jaona. Rehefa vita izy, dia nasainy nihira i Dick.

Nihazona kasety iray misy fanamafisam-peo lehibe hanamafy ny feony i Dick. Nanomboka nihira ny Apokalypsy 5:12 nataon'i Don Wyrzten izy:

*Mendrika ny Zanak'Ondry izay novonoina,
Mendrika ny Zanak'Ondry izay novonoina,
Ny Zanak'Ondry izay novonoina dia mendrika ny
handray:*

*Hery sy harena sy fahendrena sy faherezana,
Haja sy voninahitra ary saotra!*

*Mendrika ny Zanak'Ondry
Mendrika ny Zanak'Ondry
Mendrika ny Zanak'Ondry izay novonoina
Mendrika ny Zanak'Ondry*

Nanakoako manerana an'i Patmos izany hafatra izany.

Talohan'ny nahavitan'i Dick dia nisy fiara fitaterambahoaka hafa tonga. Nandalo ny ankamaroan'ny olona,fa nisy vehivavy kely mainty hoditra nanatona an'i Dick ka nandrora azy, kanefa tsy nanakana azy hanohy ny hirany izany. Nohiraina hatramin'ny farany mihitsy aza „*Ho an'ny Zanak'ondry*“.

Nisy tamin'ireo Kristiana mpitsangatsangana dia nilaza fa tokony hanameloka ilay nanao ratsy an'i Dick, saingy tsy mba nitovy hevitra tamin'izy ireo izy. Eny tokoa, ny Tompo aza niaritra henatra ary fandrorana fony teto an-tany kanefa tsy namaly akory izy na ny kely aza. Naneso sy nanevateva ary nororany Izy, kanefa tsy namaly ireo araka izany. Rehefa nandrora an'i Jesosy Tamin'ny alalan'ny fandrorana sy fanalana baraka ny Tompo no nanehon'ny olona, izay zavaboahariny, hoe „Tahaka izao no handraisanay anao“. Kanefa Rehefa maty teo amin'ny hazofijaliana Jesosy, noho ny otantsika, dia novaliany tsotra tamin'io fotoana io kosa hoe: „Tahaka izao no haben'ny fitiavako anareo“.

Voantso hanana ny Fanahiny isika. „*Ry malala, aza mamaly ratsy, fa omeo lalana ny fahatezerana; fa voasoratra hoe: Ahy ny famaliana; Izaho no hamaly, hoy Jehovah*“ (Rom. 12:19). Mihaina anatin'ny Fahasoavan' Andriamanitra isika, fa tsy amin'ny fotoana famaliany sy hitsarany antsika.

ILAY JIOSY MPIVIDY FAKO

Tamin'ny fotoana izay nitehirizan'ny olona gazety, voro-damba, ary metaly, dia matetika mandre mpanangona ireny mandeha eny amin'ny arabe izy ireo ary miantsoantso ny olona.

Indray andro, i H.A Ironside dia nahare antso, nivoaka haingana nankeo am-baravarana izy ary nilaza tamin'ilay lehilahy mba ho ao amin'ny lakavy. Jiosy io mpividy fako io, anisan'ny firenena tena tian'i Ironside satria Jiosy tokoa ny Mpamonjy azy.

Tao amin'ny lakavy dia nisy antontan-gazety maro, ary fantsona vy sy metaly hafa.

Nanao fifanarahana izy mba ahazoany vidiny mora. Izay ampahalalaka ny lakaviny no tena tanjony fa fahazarana ho an'ny olona fotsiny ihany ilay miady varotra.

Noho izany dia nidera ny hasarobidin'ny fanangonampakony izy. Saingy tsy azon'ilay mpivarotra izay ezahiny hatao, ka dia nilalao tsara izy ary nandresy! Nanolotra vola kely ho an'i Ironside izy ary nanomboka naka ny entana tao aminy.

Rehefa nandeha niaraka tamin'ny entana farany izahay, dia niantso azy indray i Dr Ironside, nanendry vola teny an-tanany, ary niteny hoe: „Indro, tiako homena anao amin'ny anaran'i Jesosy izany.“

Talanjona vetivety ilay rangahy mpivarotra. Dia lasa izy sady nimenomenona hoe: „Tsy mbola nisy nanome

ahy na inona na inona tamin'ny anaran'i Jesosy taloha.“

Moa ve tsy toy ny nataon'i Jesosy io fihetsika tsara nataon'i Dr Ironside io?

ILAY GLADIATERAN'NY EMPERORA

Fotoana vitsivitsy taorian'ny nitsanganan'i Kristy tamin'ny maty nonanjaka i Néron, mpanjaka malaza ratsy fanahy. Nanana miaramila manokana izy, nofidina noho ny tanjany sy ny heriny izay tena miavaka. Nantsoina hoe Gladiateran'ny Emperora izy ireo. Ara-batana, ireo lehilahy ireo dia santionany miavaka amin'ny maha-olombelona. Tsara tarehy izy ireo, be hozatra, ary maneho tsara izany hoe lehilahy romana izany.

Rehefa niditra tao amin'ny Coliseum izy ireo, dia nihira hoe: „Isika no mpiady amin'ny Emperora. Miady ho anao izahay, ry mpanjaka. Na ho velona na ho faty, dia ho voninahitrao izany.“ Dia nanao lalao tolona ho an'i Néron izy ireo.

Tonga ny fotoana nandefasana azy ireo nianavaratra hiady amin'ny foko alemaina. Tamin'io fotoana io ihany koa no nivoaka ny didim-panjakana hanakanana ny finoana kristiana. Nandefa baiko manokana i Néron mba hanesorana izay Kristiana mety ho ao amin'ny tafika. Izany hoe fandranganana tanteraka azy ireo mihitsy.

Nandritra ny ririnina, ny Jeneraly Vespasian dia nandahatra ny miaramilany, anisan'izany ny gladiatera. Nivazavaza izy hoe: „Lasa saina ihany aho amin'ity fivavahana vao nipoitra ity. Mino aho fa ianareo dia santionan'ny olona tena misaina ary tsy ho latsaka amin'izany. Kanefa raha toa misy aminareo manaraka

ny Kristianisma dia manantona ety aloha ety.“ Gaga izy fa nisy gladiatera efapolo nandroso, tsy natahotra ny ainy ho faty.

Noroahin'ily jeneraly ny miaramila hafa rehetra ary niresaka tamin'ireo efapolo mba hiova hevitra momba ny finoany izy ireo. „Eritrereto ny fianakavianareo. Eritrereto ny miaramila namanareo. Eritrereto tombontsoa anareo maro izay ho very. Eritrereto ny ho vokany raha tsy miala amin'ny Kristianisma ianareo.“ Kanefa nitana ny heviny hatramin'ny farany ireo miaramila efapolo ireo.

Rehefa hitan'i Vespasien fa tsy vonona ny hiova ireo, dia namory ny miaramilany rehetra indray izy ary nibaiko azy mba hiova hevitra.“ Izay kristiana rehetra ato amin'ny tafika! Aoka handroso ety aloha ety!“ Nandroso tsy nisy fisalasalana izy efapolo. Afaka nanome baiko ny miaramila sasany hamono azy ireo izy saingy baiko hafa no nomeny.

Ary rehefa latsaka ny haizina, dia nentin'ny miaramilany nivoaka teo amin'ny farihy efa nivaingana izy ireo, dia nesoriny ny fitafian'izy ireo, ary navelany tao anatin'ny hatsiaka mangidy izy ireo mba ho faty tsy hita maso. Hoy i Vespasien tamin'ireo lehilahy mitanjaka: „Raha miala amin'ny finoanareo ianareo, dia miverena any amoron-tsiraka. Hisy afo manodidina ny farihy ary fitafiana mafana sy sakafo izay miandry anareo.“

Nandritra ny alina, ny miaramila hafa, izay nijanona teo amin'ny farihy, dia nibanjina tao anatin'ny haizina mba hijery izay mitranga. Tsy nahita tsara izy ireo, fa indraindray dia nandre ny lehilahy nihira hoe: „Isika no mpiady efapolon'i Kristy. Mitolona ho Anao izahay,

ry mpanjaka ô! Na ho velona na ho faty dia ho voninahitrao izany.“

Nony vao mangiran-dratsy, dia nahita olona iray mampahonena izy ireo niampita ny ranomandry nankany amin’ny iray tamin’ny afo. Nirohotra nitsena azy ny miaramila, nofonosiny bodofotsy, ary nentiny haingana tany amin’ny hafanan’ny afo. Niala tamin’ny finoany ilay lehilahy.

Dia nandre hira iray teny ampitan’ny farihy izy ireo nanao hoe: „Isika mpiady sivy amby telopolon’i Kristy. Mitolona ho Anao izahay, ry mpanjaka. Na ho velona na ho faty dia ho voninahitrao izany.“

Tonga ara-potoana i Vespasien mba hahita ilay mpandositra iray sy handre ireo mpandresy sivy amby telopolo. Nanapa-kevitra ihany koa izy ka nesoriny ny fiadiany ary nandeha izy mba ho faty miaraka amin’ireo sivy amby telopolo lahy izay naleony ho faty toy izay handa ny Tompony.

Toko faharoa amby roapolo

ILAY DIDY VOALOHANY MISO FAMPANANTENANA

Reuben Torrey, evanjelista amerikanina sady manam-pahaizana momba ny Baiboly, dia niresaka momba ny renim-pianakaviana iray maty vady tao Georgie izay nanan-janakalahy tokana. Tena farak'izay nahantra ireo, ary fanasana lamba no hany mba asa fivelomany. Tsy nitaraina mihitsy izy satria fantany fa avy amin'ny Tompo no zava-miseho aminy.

Tena nanam-pahaizana ilay zanany. Raha ny marina, izy no voalohany tamin'ireo mpianatra nahazo mari-pankasitrahana tao amin'ny lysea. Ankoatra ny Tompo, dia reharehan'ny reniny tokoa izy.

Noho ny vokatry tsara azo nandritry ny taom-pianarana dia voafidy hamaky ny lahateny famaranana ny taom-pianarana izy. Ary hotolorana medaly volamena ihany koa izy ho mariky ny nahazoany naoty ambony indrindra tamin'ny taranja iray.

Rehefa tonga ny andro hanaovana ny fizarana diplaoma, dia hitany fa tsy niomana hanatrika izany ny reniny. Hoy izy taminy: „Neny, androany no andro anaovana ny lanonana hamaranana ny fianarana, nahoana ianao no tsy miomana?„

„Oh“, hoy izy sady sadaikatra niteny hoe: „Tsy handeha aho. Tsy manana akanjo mendrika anaovana aho. Ho eo ny olo-malaza rehetra ao an-tanàna, mitafy ny haingony. Ho menatra amin'ny reninao antitra amin'ny akanjony maloto sy rovidrovitra ianao.

Namirapiratra ny fiderana ny reniny ny masonry. „Neny“, hoy izy, „Aza miteny an'izany mihitsy. Tsy ho menatra anao na oviana na oviana mihitsy aho. Sanatria! Ny ananako rehetra eto amin'izao tontolo izao dia avy aminao, ary tsy handeha aho raha tsy miaraka amiko koa ianao.“ Tsy namelany mihity izy mandra-paneken'ny. Nampanaoviny ny akanjo izay tsara indrindra ny reniny.

Nanomboka nidina teo amin'ny arabe izy mianaka nifampitantana. Raha vao tafiditra tao amin'ny efitra fivoriana ny lisea ireo, dia nentiny nankany amin'ny iray amin'ireo seza tsara indrindra teo aloha izy. Ary teo izy dia nipetraka tamin'ny akanjony vita amin'ny landihazo vao vita pasoka; teo akaikin'ireo manampahefana izay nitafy ny akanjo tena tsara indrindra sy namirapiratra be.

Rehefa tonga ny fotoana itenenany dia tsy nisy diso ny lahateniny. Tehaka be dia be no azony. Notoloran'ny talen'ny sekoly ny medaly volamena izy noho ny zava-bitany. Raha vao nahazo izany izy dia nidina niala teo sehatra izy ary nandeha nankany amin'ny reniny, nametaka ilay medaly volamena teo aminy sady niteny hoe „Indro Neny, anao ity, ianao no nahazo azy.“ Naredona ny tehaka tamin'ity indray mitoraka ity. Nitsangana ny mpanatrika ary nilatsaka teo amin'ny takolaky ny maro ny ranomaso. Nanome ohatra velona momba ny fankatoavana ny Efesiana 6:2 io zanany io: „Manajà ny rainao sy ny reninao.“ Isaky ny nitantara ny tantara ny Dr. Toeery, dia nanao fampiharana fanampiny izy. Hoy izy hoe: „Aza menatra an'i Jesosy Tompo na oviana na oviana fa avy

amin'ny zavatra rehetra amin'ny fiainanao. Mitsangàna ka maneke Azy. Tsy menatra ny maritiora. Tsy menatra an'i Paoly i Onesiforo (2 Tim. 1:16). Tsy menatra ny filazantsara i Paoly (Rom. 1:16) na Ilay ninoany (2 Tim. 1:12). Tsy tokony ho menatra an'i Kristy mihitsy isika.“

ILAY ANDRIAMANITRA TIA²¹

Ao amin'ny tantaran'ny Kristianisma, Gladys Aylward dia fantatra amin'ny anarana hoe „Ilay Vehivavy Kely“. Tsy be vatana mihitsy izy. Kanefa raha teo amin'ny fanompoana an'Andriamanitra dia tena hita fa olona tena lehibe amin'izany izy. Nanana herin-tsaina sy fahazotoana izy, vonona hiaritra fanenjehana hatrany noho ny fanompoana ihany koa izy. Vokatra izany? Nivaly avokoa ny vavaka nataony. Ny nitranga tamin'ny fiainany dia lavorary avokoa. Ary nanana fahafahana maro hizara ny filazantsara tany Sina izy.

Nipetraka tao an-trano niaraka tamin'ireo mpianatra nandositra ny mpanafika Japoney izy indray mandeha. Nivavaka ho an'ny faritra iray any avaratra andrefana ireo tanora ireo. Noho ny antony maro samihafa dia tsy afaka nandeha malalaka i Gladys, ka nihevitra i Gladys fa tian'ny Tompo handeha izany izy. Nandeha izy, niankina tamin'ny mpitari-dalana hanaraka azy avy any amin'ny tanàna iray mankany amin'ny iray hafa. Rehefa tonga tany Tsing Tsui izy, dia niezaka ny tsy hiala lavitra ny mponina. Hoy izy ireo: „Tsy toy izany no hiafaran'izao tontolo izao. Tsy maintsy manohy aho. Izany no nahatongavako.“

Rehefa hitan'ny dokotera kristiana sinoa iray atao hoe Huang fa tapa-kevitra izy, dia nanoso-kevitra ny hiaraka aminy mandritra ny dimy andro. Naharitra hatramin'ny folo andro ilay dimy andro noeritreretiny, raha niresaka momba an'i Jesosy tamin'izay rehetra sendra

azy izy ireo. Tsy nisy nahalala na olona iray ny momba izany Jesosy izany. Tamin'ny andro fahiraika ambin'ny folo dia nandeha tany amin'ny toerana tena maina. Tsy nahitana na olona, na toerana hakana aina na sakafo ihinanana aza. Fotoana hivavahana izao. Hoy i Gladys: „Andriamanitra ô, mamindrà fo aminay. Hitanao izao fahoriana mahazo anay izao. Omeo hanina sy fialofana izahay mandritra ny alina.“ Nahatsiaro sadaikatra izy satria toy ny vavaka tia tena ny vavaka nataony.

Dia nivavaka i Dr Huang hoe: „Andriamanitra ô, alefaso aminay ilay tianao holazainay momba an'i Jesosy. Tsy nitory tamin'iza na iza izahay androany, fa noho ny antony manokana no nandefasanao anay aty.“ Tsy niraharaha afa-tsy ny asan'ny Tompo io lehilahy io.

Nanapa-kevitra i Gladys fa tokony hihira hanakoako ho ren-danitra zy ireo, ka ny hirany dia re manakoako teny rehetra teny.

Vetivety dia nahita lehilahy iray teny lavidavitra teny i Dr Huang, dia nitsambikina izy ary nirifatra nitsena azy. Niantso an-dRamatoa Aylward ny dokotera mba ho avy, saingy tsy te-hananika ilay tendrombohitra mideza sy mikitoantoana izy ary namela ny entany tsy nisy mpiambina. Nalain'ilay dokotera izy ary nanaiky ihany ny farany. Tsy mila manahy ny amin'ny entany izy; tsy nisy nangalatra izany.

Rehefa tonga tany amin'ilay lehilahy izy ireo, dia gaga izy fa nahalala fa lama na moanina Tibeana izy. Na dia tsy tokony hifandray amin'ny vehivavy aza ny moanina, dia nanasa an'i Huang sy Gladys izy mba ho avy hatory ao amin'ny toeram-pisakafoanana. Rehefa hitan'ilay

mompera fa niasalasala izy, dia hoy izy: „Efa niandry ela izahay mba hilazanao aminay ny amin'ilay Andriamanitra tia.“ Taitra ilay vehivavy kely. Ahoana no nahafantaran'izy ireo fa misy Andriamanitra tia? Inona no mety ho nifandraisan'ny olona nitokana toy izany tamin'ny misionera na tamin'ny olona hafa avy any ivelany?

Rehefa avy nanome ondana sy rano fanasan-damba ary sakafo matsiro ny moanina, dia niseho teo am-baravarany Gladys ny roa tamin'izy ireo ary niangavy azy hiaraka taminy. Ny sasany kosa nitondra an'i Dr. Huang teo amin'io toerana io ihany, efitra iray misy moanina 500 nipetraka teo ambony kiraro. Nanahiran-tsaina an'i Gladys izany rehetra izany, saingy tsy maintsy takatr'ilay dokotera tsara ny anton'ny fiharian'izy ireo ka nasainy natomboka tamin'ny fihirana hira iray izy. Rehefa vita ilay izy dia nitantara momba ny nahaterahan'ny Mpamonjy tao Betlehem izy ary nitohy hatramin'ny nahafatesan'ny Mpamonjy sy ny fitsanganany tamin'ny maty.

Nihira indray i Ramatoa Aylward, avy eo niresaka, nihira indray, dia niresaka indray i Dr Huang, niresaka indray. Farany, niala tsiny izy tamin'izy ireo izy ary nankany amin'ny efitranony. Reraka izy. Saingy tsy vita ny asa. Nisy moanina roa niseho teo am-baravarany. ary niangavy azy mba hilaza bebe kokoa azy ireo. Rehefa lasa izy ireo, dia nisy roa hafa tonga, ary izany dia nitohy nandritra ny alina. Toa liana indrindra tamin'ilay Andriamanitra tia azy izy ireo.

Taorian'ny dimy andro nitory ny filazantsara tsy nisy sakana, dia nasaina hivory tamin'ny lehiben'ny lama i

Ms Aylward. Nanamaivana azy ny nahafantatra fa nahay teny mandarin ireo, izay fiteny tena azony tsara. Nanontany izy hoe nahoana no namela vehivavy hafa firenena hiditra tao amin'ny monastera izy ary niresaka tamin'ny pretra. Nitantara ity tantara miavaka ity izy avy eo:

Isan-taona ny moanina dia manangona sy mivarotra ahitra misy mampiavaka azy manokana izay maniry eny an-tendrombohitra izy ireo. Isan-taona, raha nandeha rameva nankany an-tanàna iray izy ireo, dia nandre lehilahy iray nitana taratasy mivalona ary niantsoantso hoe: „Iza no mila? Maimaim-poana ny famonjena. mahazo ny famonjena ho velona mandrakizay. Raha te hianatra bebe kokoa ianao dia mankanesa any amin'ny efitranon'ny filazantsara.“

Nentin'izy ireo teo amin'ny monastera ilay taratasy mivalona ary napetany teo amin'ny rindrina. Iza no voalaza ao amin'ny Jaona 3:16: *„Fa toy izao no nitiavan'Andriamanitra izao tontolo izao: nomeny ny Zanani-lahy Tokana, mba tsy ho very izay rehetra mino Azy, fa hanana fiainana mandrakizay.“* Izany dia fampahatsiahivana tsy tapaka ho azy ireo fa misy Andriamanitra tia.

Nandritra ny dimy taona no nitondran'izy ireo ny anana tany an-tsena, ary nanontany azy tsirairay hoe taiza no nipetrahan'ilay „Andriamanitra tia.” Farany, tao amin'i Len Chow, nisy lehilahy iray nitarika azy ireo ho any amin'ny toeram-ponenan'ny Misiôn'an'i Sina Inland izay nisy misionera iray nanazava ny lalan'ny famonjena ary nanome azy ireo kopia. ny Filazantsara. Rehefa nandinika izany izy ireo, dia tonga tao amin'ny

Marka 16:15: „Ary hoy Izy taminy: Mandehana any amin'izao tontolo izao ianareo, ka mitoria ny filazantsara amin'ny olombelona rehetra.“ Avy amin'izany no nanatsoahan'izy ireo fa amin'ny farany dia hisy olona hanatona azy ireo hitondra ny filazantsara. Nanapakevitra izy ireo fa rehefa naniraka iraka Andriamanitra, dia tokony ho vonona handray Azy izy ireo.

Niandry telo taona indray izy ireo. Avy eo dia nisy moanina roa, niasa teny an-tendrombohitra, nandre olona nihira. Hoy izy ireo: „Ny olona mahalala an' Andriamanitra ihany no hihira.,, Rehefa nidina ny tendrombohitra ny lehilahy iray mba hihaona tamin'i Gladys sy Dr Huang, ny iray hafa niverina tany amin'ny monastera, nanaitra ireo moanina namany mba hiomana amin'ireo vahiny efa nampoizina hatry ny ela.

Izany no nahatonga an'ireo Kristiana roa ireo nandray tsara sy tamin'ny fo nangetaheta.

Moa ve nisy tamin'ireo moanina niova fo? Tsy fantany i Gladys izany. Ny hany fantany dia ny Tompo dia nitarika azy sy Dr Huang ho any amin'izy ireo tamin'ny alalan'ny andiana fanendrena avy amin'Andriamanitra, ary afa-po tamin'ny famelana ny vokatra ho eo Aminy izy. Mety ho nandamina toe-javatra sarotra toy izany izy ka ho sorena ihany nony farany.

Nanahaka an'i Jesosy Tompo ilay vehivavy kely tamin'ny finoany vaovao sy tsara, tamin'ny fankatoavany ny bitsika nataony, ary tamin'ny fiekena tamimpahatokiana Azy teo anatrehan'ny hafa. Hitany nizotra tsara avokoa izay rehetra nokasaina ho atao amin'ny fiainana. Namirapiratra tamin'ny herin'ny maizina ny

fanompoana nataony. Rehefa nikasika fiainana hafa izy,
dia nisy zavatra nitranga ho an'Andriamanitra.

FAHASOAVANA MAHAGAGA²²

Homeko anarana hafa ireto mpivady ireto. Ho hitanareo miandalana eny ihany ny anton'izany. Ernie dia manamboninahitra tao amin'ny tafika amerikana, nipetraka tao amin'ny toby lehibe iray tany Etazonia. Nikarakara tokantrano kosa ny asan'ny vadiny, Elyse. Nihevitra izy fa ny hijanona ao an-trano sy hitaiza ny zanany roa no tokony ho andraikiny. Ankoatra ny tsy fitovian-kevitra madinidinika mahazatra, dia niaina tao anaty fanambadiana sambatra izy ireo.

Avy eo i Ernie dia nafindra tany Japon. Tamin'ny fotoana tsy nahafahana nitondra ny fianakaviana tamin'izay. Fa ity fianakaviana ity dia nifandray akaiky tamin'ny alàlan'ny mailaka. Zava-dehibe foana isan-kerinandro raha nisy taratasy tonga avy tamin'i Dada. Nipetraka tamin'ny tany teo akaikin'i Neny teo ampamakiana ilay taratasy tamin'izy ireo izy. Nanjary anton-dresaka tao an-trano ireo vaovaon'i Dada. Toa tsy mba alavitra izy.

Taitra anefa ry zareo rehefa nandeha ny herinandro tsy nisy taratasy. Elise dia nanahy ihany. Na i Ernie dia narary, na tao nisy lozam-pifamoivoizana, na nandeha mission tsy ahafahana nilazana vaovao. Roa herinandro no lasa, ary tsy nisy taratasy. Raha nisy loza na aretina dia efa nampandrenesina izy izao. Telo herinandro nefa mbola tsy nisy mailaka. Efatra herinandro. Tamin'ny farany dia nisy taratasy tonga, ka latsaka ny ranomasony. Tanteraka ny tahotra izay nampanahy an'

Elise.Tena tsy nampino izany. Inona no nataony ka mendrika an'izany? Kivy izy, kivy loatra ka tsy afaka mizara izany amin'ny ankizy.

Farany, nanontany ny iray tamin'ireo ankizy hoe: „Neny, inona no tsy mety? Nisy zavatra nitranga tamin'i Dada ve? Inona no nolazainy tao amin'ny taratasy?“

Fahoriana be ho azy ny nilaza tamin'izy ireo fa raiki-pitia tamin'ny vehivavy hafa ny rainy. Hitany teo amin'ny endrik'izy ireo ny fahatairana. Mazava ho azy fa tsy zakany izany tamin'izay fotoana izay. Saingy tsapan'izy ireo fa tsy ho avy ny Dadany. Farany, hoy ny iray tamin'izy ireo: „Neny, afaka manontany anao ve aho? Satria tsy tia antsika intsony i Dada dia midika ve izany fa tsy afaka mitia azy isika?“

Nanaitra an'i Elise ilay fanontaniana. Nampahatsiahy azy ny Salamo 8:2 izany „*Avy amin'ny vavan'ny ankizy madinika sy ny minono no nanorenanao hery noho ny mpandrafy Anao, mba hampanginanao ny fahavalo sy izay ta-hamaly ratsy.*“ Tao anatin'ny famoizam-po sy ny alahelony, dia tsy tonga tao an-tsainy mihitsy izany hevitra izany. Rehefa avy nitolona tamin'ilay fanontaniana izy, dia namaly izy hoe: „Tsia, avela ho tia azy izahay“. Fa nisy fery teo amin'ny tendany rehefa nilaza izany. Hoy ny zanany kely: „Hanoratra azy ve ianao ka hangataka azy mba hanoratra aminay foana, fa mbola te ho tia azy izahay?“ Midika izany fa mbola avy aminy ihany ny taratasy.

Rehefa nanao izany izy ireo, dia nibaribary ny antsipiriana'ny fivadihany. Raiki-pitia tamin'ny mpanompony dimy ambin'ny folo taona izy. Taty

aoriana dia nanan-janaka maromaro tamin'io fanambadiana io izy. Mbola sahirana i Elise tamin'ny nino ny zava-nitranga. Fahatezerana hafa no niandry azy.

Taratasy avy any amin'i Ernie izany. „Ry Elise, miala tsiny aminao aho raha manoratra izao. Fa voan'ny homamiadana aho ary efa kely sisa any andro iainako. Very ihany koa vola fisotroan-dronono ary tena sahirana izahay amin'ny fivelomana. Rehefa maty aho, afaka mba mandefa vola kely hanampiana ny ankohonako ve ianao?

Rehefa avy namaky izany i Elise dia niteny anakampo hoe, „eny, fantatro daholo izao ny zavatra rehetra. Tsy nampino azy ny zavatra henony, ny fahasahian'i Ernie. Tsy nisy na dia teny iray fifonanana akory aza, tsy mba niaiky ny fahadisoana nataony. Tsy takatry ny saina izany.

Rehefa nisaintsaina lalina kokoa anefa izy, dia tsaroany ny fanontanian'ny zanany zanany hoe: „Neny, satria tsy tia antsika intsony i Dada, dia midika ve izany fa tsy afaka ny ho tia azy isika?“ Dia nanoratra izy fa tsy afaka mandefa vola. Kanefa misy fanampiana hafa afaka ataony. Nanoratra izy hoe: „Holazaiko aminao izay hataoko. Ahoana raha manao izay ahatongavany aty Amerika ianao? Afaka mijanona ato zareo ary Hampianatra azy ireo ny fomba ny toe-tsaina aty aho ahafahany mahaleo tena avy eo.“

Ary izany no nitranga. Nanazava i Elise tatỳ aoriana hoe: „Nanana safidy roa aho. Afaka nanozona an'io lehilahy io noho ny zavatra nataony tamiko, na misaotra an'Andriamanitra aho noho ny nanomezany

ahy hery nahafahako nitraka sy nampamirapiratra ny hazavan'ny Tompo amin'ity fotoana tena maizina amin'ny fiainako ity.“

Tsy isalasalana fa ny famirapiratana ny hazavan'i Kristy amin'ity fiainako ity, ary ny fizarana ny filazantsara tamin'ity fianakaviana natsangana ity mba hahatonga azy ireo ho tonga fahazavana ho an'ny Tompo ihany koa.

Marina ny tenin'ny Tempolin'i Acrhbishop hoe: „Avy amin'ny devoly ny famaliana ratsy ny tsara atao amina; isika olombelona kosa dia notezaina hoe valiana amin'ny tsara ny tsara, ary amin'ny ratsy ny ratsy; fa avy amin'Andriamanitra kosa ny famaliana ho soa ny ratsy natao anao.“

NITIA NY MAHANTRA IZY²³

John Nelson Darby dia olona marina, tsy mba naka mpanankarena sy olo malaza ho namana izy. Somary tsy tao amin'ny toetrany izany na dia notezaina tao amin'ny tokantrano mpanankarena sy tao amin'ny fiaraha-monina manana ny maha izy azy aza izy. Na dia hoe nety kokoa taminy ny niray tamin'ny ireo mpanankarena hafa na mandeha amin'ny toerana mifanaraka amin'ny toerana tokony hisy azy..

Nefa tena tia ireo mahantra izy ary ny fihetsiny dia tena naneho hoe tamin'ny fony ny fitiavany ireo. Indray mandeha, rehefa nitety firenena maro nitoriana filazantsara izy, dia tonga tamin'ny fiaran-dalamby iray izy, izay nokasainy hivoriana andro maromaro. Nisy Kristiana be dia be nivory teo amin'ny gara mba hitsena azy; anisan'izany vehivavy mpanankarena vitsivitsy izay nikasa hampiantrano azy. Raha nandeha tany amin'ny tranon'izy ireo izy, dia nahazo sakafo tsara sy fanaka tena lafo vidy nahafahany nampiasaina. Ireo mpampiantrano mmoa dia faly nirehareha tamin'ny namany hoe nampiantrano ilay mpitoriteny tena malaza be.

Nijery ny vahoaka i J.N.D ary nandinika ny zavamitranga. Nanontany an'ireo izay toa mpitarika izy hoe: „Iza amin'ny ankapobeny no mikarakara ireo mpitory teny tonga ao an-tanàna?“ Nanondro lehilahy iray izy, lehilahy tena maontina, tsy mba nisehoseho. Nankany amin'ilay lehilahy i Darby ary nanontany raha afaka

mijanona ao an-tranony izy. Faly ilay rahalahy satria tena tsy nampoizina, ary lasa izy naka ny valizy an'i Darby. Ny iray amin'ireo nitantara ny fiainan'i J.N.D dia nanoratra hoe: „Ary tahaka izany no nampiantranon'ilay lehilahy lehibe olona tsotra ho lasa mpampiantrano olona tena malaza be.“

Nanazava ny fitiavany ny mahantra i Darby.

Kristy dia tia ny mahantra; hatrizay nandraisako ny Tompo, dia nanahaka Azy koa aho. Raha misy misafidy ny hiaraka amin'ireo manana dia avelao any. Raha sanatria mifanojo aminy aho rehefa any Londre iny, dia tena tsy ho azoko ny aiko. Samy manana ny toetrany avokoa izy roa ireo kanefa rehefa any amin'ny mahantra aho, dia tsapako misy zavatra mahasamihafa izy roroa: ny manan-karena izay mbola voasariky ny fananany dia mandinika tsara hatraiza no fetra hanarahany ny Tompo, mba tsy ho voakitika ny fiainany milamina; ny mahantra kosa mandika ny fomba hanampin'i Jesosy azy ahafahany miatrika ny fijaliany.

Mahavariana fa tamin'ny fanofanana ny mpianatra fitopolo no nampitain'i Kristy ny foto-kevitra ny fandraisana vahiny.

„Ary izay trano idiranareo, dia lazao aloha hoe: Fiadanana ho amin'ity trano ity. Ary raha misy zanaky ny fiadanana ao, dia hitoetra ao aminy ny fiadanana tononinareo; fa raha tsy izany, dia hiverina ho aminareo ihany izany. Ary mitoera ao

amin'izany trano izany, ka mihinàna sy misotroa izay zavatra omeny; fa ny mpiasa miendrika hahazo ny karamany. Aza mifindrafindra trano.,, (Lio. 10:5-7)

Teo Izy dia nampianatra fa tokony hanaiky ny fandraisana ataon'olona iray na iza na iza rehefa antsitrano no hanaovany izany. Ary tsy tokony handao trano hifindra trano hafa izy ireo, raha hanantena hahazo trano fialofana sy sakafo tsara kokoa.

Tsy mitovy ny toe-javatra natrehin'i Darby. Eto no tokony hanaiky izay natolotra azy izy. Teo izy dia nangataka ny hiaraka hipetraka amin'ny mahantra. Saingy mitovy ny foto-kevitra. Tsy tokony andeha amin'ny trano tsara ianao. Mariho ny didy hoe: *Mitoera ao amin'ny trano iray ihany, fa aza mitetitety trano.*

Toko fahenina amby roapolo

TSY MIKIRARO ANY AM-PIANGONANA²⁴

Dennis DeHaan, nanoratra tao amin'ny „Mofon'Aina Isan'andro“, dia nitantara ny izay olana nitranga tao amin'ny fiangonan-dehibe iray tany ambanivohitra. Indray alahady, dia nisy tanora iray, izay tamin'ny fiangonana rahavavy nandalo nivavaka tany. Tsy nikiraro, ary t-shirt sy jean no nanaovany. Sadaikatra ary ny mpiangona no nilaza hoe tsy azo atao anie ny tsy mikiraro am-piangonana eh! Ary tsy fantany angaha fa tokony hanao lobaka sy palitao izy?

Nandroso tany aloha i Bill satria feno loatra ny dabilio ary tamin'ny tany teo alohan'ny pilipitra izy no nipetraka. Tsy mbola nisy nanao an'izany hatramin'izay. Toy ny nandika lalanan'ny fiangonana tao i Bill, ary tena tezitra taminy ny sasany tamin'ireo mpiangona.

Nony avy eo, nisy zokiolona nitondra tehiny iray, izay narary lamosina, dia nandroso teny aloha koa, ary rehefa teo akaikin'i Bill izy dia niondrika ka nipetraka teo akaikiny. Tsy navelano ho irery teo io tovolahy io.

Mampahatsiahy ahy ny zava-nitranga mitovy amin'izany izay nitranga tao amin'ny trano fiangonana tsy lavitra ny toerana misy ahy. Tamin'ny andron'ny ireo antsoina hoe „hippies“, izay tia miravaka felamboninkazo. Nisy mpino vaovao niseho teo amin'ny Fanasan'ny Tompo tamin'ny takarivan'ny andro, tsy mba nanao kiraro koa izy. Tsy dia maro norarahin'ny olona ihany koa izy. Fa nisy zokiolona iray nahita ny zava-nitranga, ka rehefa vita ny lahateniny, dia

nanantona izy, nanodidina an'ilay tovolahy ny tanany ary niteny hoe: „Tsy maninona fa tsara tarehy ireo.“ "Dia namaly izy hoe, „Eny, teny efa tahak'izany hatramin'ny voalohany mihitsy ireo.“

Velom-pankasitrahana ny amin'ireo zokiolona ireo sy ny mpino rehetra izay tsy mijery ny ivelany fa mahita ilay fo tia an'i Jesosy Tompo. Ny fanakianana dia hampiemotra azy ireo, fa ny fitiavana kosa no hanampy azy ireo hitombo. Hoy tokoa Kristy: „Avelao izy hanatona Ahy.“

Toko fahafito amby roapolo

ILAY TIFITRA TAO AMAZONIA

I Charity dia zazavavy iray, fito volana, natsangan'i Jim sy Roni Bowers. Lasa tany amin'ny consulat any Leticia-Kolombia izy ireo mba hanamboatra visa ho an'ny zanany ahafahany hipetraka any Peroa. Vita izay dia nanidina niverina tany an-tranony tany Iquitos-Peroa ry zareo, tamin'ny Cessna (ilay fiaramanidina kely fampiasan'ireo misionera tany). Ilay mpanamory dia mpiara-miasa amin'ny misiônera sy namany akaiky, Kevin Donaldson. Variana nitazana ny hatsaran'ny tontolo iainana ihany koa i Cory Bowers, fito taona, zanak'i Jim sy Roni.

Vetivety dia tsikaritr'i Kevin sy Jim fa nanenjika azy ireo ny mpiady an'habakabaka Peroviana. Tsy hitan'izy ireo fa nisy fiaramanidin'ny CIA izay niara-niasa tamin'ilay mpiady. Izy ireo dia iraka mba hanenjika ireo mpivarotra zava-mahadomelina amin'iny faritra iny. Nilaza moa ny CIA fa manoro hevitra ny mpanamory Peroviana izy ireo mba hanadihady tsara alohan'ny hitifirana an'ilay Cessna, saingy tara loatra.

Ny bala iray dia nahazo ny lamosin'i Roni, avy eo teo amin'ny lohan'i Charity, izay teo amin'i Roni. Namoy ny ainy teo no ho eo izy mianaka. Voatifitra ihany koa ny tongotr'ilay mpanamory.

Ary ny bala hafa dia nahavao ny fitoeran-tsolika ka nandoro ny fiaramanidina. Afaka namono ny afo tao amin'ny kabine i Jim ary i Kevin dia nametraka tamin'ny fomba mahagaga ilay fiaramanidina nirehitra

teo amin'ny ranon'i Amazonia. Nanohy nitifitra ireo misiônera ilay mpiady, na dia efa nijanona aza ilay fiaramanidina.

Tamin'io fotoana io dia nirehitra ny fiaramanidina, saingy afaka naka ny fatin'ny vadiny sy ny zanany vavy i Jim ary nitondra azy reo. Nilamintsaina izy nilomano na dia teo aza ny afo nirehitra.

Nilomano niaraka tamin'i Kevin teo an-damosiny i Cory. I Jim kosa nisintona ny fatin'i Roni sy i Charity. Nohazoniny niankohoka izy ireo mba tsy ho hitan'i Cory ny tarehin'ny reniny sy ny rahavaviny maty. Rehefa nilentika ny fiaramanidina ka maty ny afo, dia afaka nilomano niverina i Kevin sy Jim ary nifikitra tamin'ny sisan'ilay fiaramanidina izay nitsingevana.

Tsy ela dia nisy olona tonga nanampy azy.

Ny manampahefana Peroviana sy ny ekipan'ny mpanara-maso CIA dia nifanilika noho ny famonoana tsy misy dikany sy ny tifitra. Tena nahagaga ny fihetsik'i Jim Bowers sy Kevin Donaldson manoloana ny foiben'ny misiôna tany Etazonia, Toetsaina tena nitaratra an'i Kristy. Tsy nisy fahatezerana na fandrahonana hitory. Fa kosa fanehoana fifikirana tamin'ny Tompo sy fanehoana finoana.

Hoy i Bowers tatỳ aoriana, „Ny fihetsikay amin'ireo tompon'andraikitra dia ny famelan-keloka. Toa mahagaga izany e? Tsy tokony hahagaga antsika Kristiana izany. Nivavaka ho azy ireo aho (ireo mpanamory). Tena liana ny hahafantatra bebe kokoa momba ny Tompo izy. Nantsoiko ho avy aty an-trano izy. Koa mandeha tsara ny fifandraisana. Tsy nanana alahelo aho.“

Na dia teo aza ny famoizana ny olon-tiany, dia hoy izy: „Samy miaina fiadanana tsy hay hazavaina izahay sy Cory.“ Hoy ny gazetiboky Newsweek hoe: „Vitsy ny nanana finoana mahery toy izany.“

Tamin'ny fotoam-pahatsiarovana ny vadiny sy ny zanany vavy maty, i Jim dia afaka nandinika ny tarapahazavan'ny masoandro tao anatin'ny orana. Nahita ny tanan'Andriamanitra tao anatin'ny andiana fahagagana nitranga tamin'io andro nahavaky fo io izy.

Tamin'ireo bala ireo, dia tsy nahavao an'i Cory na ny tenany na dia nisy endrika avy tao aoriany aza nanao lavaka teo amin'ny fitaratra teo anoloan'ny toerana nipetrahany.

Niasa mihoatra ny tokony ho fe-potoana hiasany ilay famonoana afo. Gaga izy.

Raha tsy nijanona teo amin'ny toerana nisy azy ilay bala nahafaty an'i Roni sy Charity, dia mety ho nahafaty ilay mpanamory izany, ary tamin'izay dia ho faty avokoa ny olona tao anatin'ilay fiaramanidina.

Na i Cory na izy dia samy tsy natahotra. Tsy nikiakiaka na nikiakiaka izy ireo. Nanana ny fiadanan'i Kristy izay mihoatra noho ny fahalalana izy ireo. Ary afaka nieritreritra tsara sy hanao fihetsika haingana.

Mila mampiasa ny tongony ny mpanamory iray raha hampidirana Cessna. Na dia naratra mafy tamin'ny tongony aza i Kevin, dia mbola afaka nampidina azy tsara, na dia lavitra ny rano aza ilay fiaramanidina rehefa voatifitra voalohany. Fantany fa ny Tompo no nitondra ny fiaramanidina teo amin'ny rano.

Nanana hery ampy fotsiny i Jim mba hamoahana ny

fatiny i Roni sy Charity tao anaty fiaramanidina na dia teo aza ny afo nirehitra. Gaga izy fa tsy nahatsapa ny hafanan'ny afo. Mitovy amin'ny an'ireo Hebreo telo lahy tao amin'ny lafaoro nisy afo mirehitra ny zavatra niainany (Dan. 3:27).

Rehefa nilentika ny fiaramanidina ka maty ny afo, dia afaka nilomano niverina i Kevin, i Cory sy Jim ary nifikitra tamin'ny sisan'ilay fiaramanidina izay nitsingevana.

Nisy lakana nisy maotera tonga naka azy ireo. Efa nanomboka lany hery nitazomana an'i Cory sy ny vata mangatsiaka izy roalahy tamin'izay.

Tamin'ny toerana tsa ahafantaran'i Jim olona no nilatsahan'ny fiaramanidina. Fa ireo izay nanatrimaso ny zava-nitranga ireo no nanana radio hiantsoana vonjy.

Tao an-trano na vadin'i Kevin rehefa nampiasa radio i Jim mba hiantso azy. Nisy namana mpanamory teo antanana, vonona ny hanidina haka an'i Kevin sy hitondra azy ho tsaboina.

Nahita fiadanana i Cory sy Jim. Na nilaza aza ny olona fa tsy haharitra izany, dia natoky kosa izy fa fiadanam-po avy amin'Andriamanitra io ka fantany fa haharitra izany.

Fahagagana iray farany. Ny Bowers, ny Donaldsons ary ireo Kristiana rehetra izay nihaina an'io voina io dia tsy mba nanana alahelo na hatezerana. Niraikitra tao aminy ny fitiavana an'Andriamanitra.

Tsy maty foana i Roni sy Charity satria niteraka vina vaovao izany. Nanao fanamby ny olona handeha ho

hanatanteraka ilay Iraka Lehibe. Hoy i Jim: „Heveriko fa tokony hamoha ny Kristiana matory Izy, anisan' izany ny tenako, ary angamba indrindra indrindra mba hanaitra ireo tsy liana na kely liana amin' Andriamanitra.“

Farany dia nohalavain'Andriamanitra ny fiainan'i Cory, ka nanome azy fahafahana bebe kokoa handray an'i Jesosy Kristy ho Tompo sy Mpamonjy azy.

Arakaraka ny fandehan'ny fotoana, dia mihamiharihary hatrany ny maha-samihafa ny Kristiana amin'izao tontolo izao. Misy fitantarana feno momba ilay fifampitifirana tamin'ny 24 Mey 2001 hita ao amin'ny gazetiboky Prime Time. Nantsoin'i Diane Sawyer hoe „Fitiavana, fijaliana, ary finoana izay tsy ho takantsika mihitsy.“

LOISA SY ILAY MPANANGONA FAKO²⁵

Vehivavy tena mahakarakara tokantranony i Loisa. Hita ao aminy avokoa ny mahavady sy reny araka ny lazain'ny tenin'Andriamanitra azy. Tena fifaliana ho azy foana ny nitaiza ny zanany fito araka an'Andriamanitra. Tsy ambaka an'izany koa anefa ny fiahiny sy anohanany ny vadiny amin'ny asany mitety faritra sy miasa tsy ankiato ho an'i Jesosy Tompo. Indro misy ohatra iray: Indray mandeha, nandritra'ny fihaonambe iray tany New Jersey, dia tsaroany fa tsingerintaona nahaterahan' ny vadiny androany. Niantso izy ary nilaza ny alahelony fa tsy afaka niaraka taminy sy nanome fanomezana ho azy. „Ny fanarahanao ny sitrapon'ny Tompo sy ny fandehananao any amin'izay toerana anirahiny anao dia efa fanomezana tsara ho ahy izany.“

Ankoatra izay, na tena feno aza ny fotoanany amin'ny andraikitra maro ao an-trano, dia tsy mba nanakana azy hanasa ny vehivavy manodidina hiaraka handinika sy hianatra Baiboly miaraka eo ampisotrana Kafe. Ampy ho azy ireo fiarahana ireo ka lasa nihena rahateo ny fifandraisana manokana amin'ny Tompo.

Indray maraina, raha nivavaka tao amin'ny efitra fandraisam-bahiny i Loisa, dia nahatsiaro ny tantaran' ilay fanasana lehibe ao amin'ny Lioka 14. Nanao fialantsiny ireo nasaina rehetra, ka naniraka ny mpanompony teny amin'ny lalambe sy ny fefy ny tompony hanery ny sasany hiditra.

Loisa dia nitondra izany tamin'ny Tompo tamin'ny

vavaka. „Tompo ô, ireo nasaiko dia nanao fialan-tsiny; Te-hankany amin'ireo hafa ho Anao aho, fa eto miaraka amin'ny zanako aho. Raha maniraka olona hafa eny amin'ny lalana ianao dia ho hasaiko amin'ny sakafonao.“

Tamin'izay indrindra no nandrenesany ny feon'ny kamiao fako iray nihemotra avy eny amin'ny lalana izy. Nijery teo am-baravarankely izy ka nahita ilay lehilahy mpanangona fako ampanaovana ny asany. Tena nampijaly azy ny asany, ny valahiny vizaka, ny lamosiny tsy lazaina intsony, niondrika ihany izy hamerenany ny ainy na tsy dia nandaitra aza.

Nijoro teo amoron-dalana i Loisa rehefa nijanona tao alohan'ny tranony ilay kamiao. Rehefa nivoaka i Reg, ilay mpamily, dia nanontany azy i Loisa hoe nanao ahoana ny lamosiny. „Tsy maninona“ hoy izy. „Tsia“ hoy izy. „Manana aretim-po aho“.

„Ka nahoana no mivesatra dabam-pako mavesatra mandritra ny tontolo andro?“ hoy izy nanontany. Aleo ariko ny ahy“, ary dia nariny tao anaty kamio ny fakony.

Namaly ilay mpitondra fiara hoe „ity ihany ny asa mba hitako“.

„Hivavaka ho anao ary aho, ny mba hahazoanao asa tsara kokoa na ho an'ny fihatsaran' ny fahasalaman'ny fonao.“

„Tsy misy miraharaha an'izany mpitondra fako izany“ hoy i Reg namaly sady nalahelo

„Andriamanitra mijery ka“hoy ny navalin'i Loisa.

Niditra tao amin'ny kamiao i Reg ary nanohy ny lalany.

Herinandro taty aoriana dia niandry teo amin'ny arabe

indray i Loisa rehefa tonga ilay kamiao. Ka dia nariny indray ny fakony. Nijery azy i Reg sady nanontany hoe: „Nivavaka ho ahy ve ianao?“

„Isan'andro!“

Tsy nino izany i Reg na dia tsy nolazainy aza.

Hoy ihany i Loisa: „Henoy. Milaza ny Baiboly fa zava-poana ny finoana tsy misy asa. Mivavaka aho fa tsy maintsy mangataka asa hafa ianao.“ Nanaiky izy, tsy niteny na inona na inona, ary nandeha.

Tany amin'ny arabe manaraka, dia nahita an'i Moira, zanakavavin'i Loisa faharoa, izay handeha ho any an-tsekoly. Rehefa nijanona teo akaikiny ilay kamiao, dia niantso izy hoe: "Eh, mivavaka ho anao izahay ato an-tranonay." Fantatr'i Reg avy eo fa misy olona miahay ihany ny mpanary fako.

Herinandro taty aoriana, rehefa niandry teo amin'ny arabe i Loisa, dia hoy i Reg: „Ramatoa Nicholson. Mino an'Andriamanitra sy ny lanitra sy ny helo aho. Misy dingana hafa ve koa ve ankoatra zay?“

Nohazavain'i Loisa taminy ny asam-pamonjen' Andriamanitra sy ny maha zava-dehibe ny dingan'ny finoana. Nihaino tsara izy, avy eo tamin'ny tsikitsiky sy nikopa-tanana azy, dia niala izy. Hoy Loisa taminy: „Matokia ary mangataka amin'izany asa izany“.

Nandritra ny herinandro iray dia nivavaka ho an'i Reg tsy tapaka ny Nicholsons. Tamin'ny andro fanangonampako dia teo amin'ny toerany teo amoron-dalana i Loisa. Nitsiky i Reg sady nivoaka avy tao amin'ny kamiao ary niteny hoe: „Eny, tena nataoko izany.“

„Nanao inona?“ Midika ve izany fa nangataka asa izy?

„Nanao ny dingana aho, Ramatoa Nicholson.“
Nohazavainy fa nametraka ny fitokisany tamin'i
Jesosy Tompo izy.

Marina ve izany? Tena efa voavonjy tokoa ve izy?
Nieritreritra i Loisa hoe: „Na marina izany na tsia, dia
tokony hamaky Baiboly izy. Raha ny marina, ny
finoana dia avy amin'ny fihainoana ny Tenin'
Andriamanitra.“ Reg, mila manomboka mamaky
Baiboly ianao. Toy ny hanina ho an'ny fanahy izany“.

„Oay, Ramatoa Nicholson, tokony ho nilaza izany
tamiko aloha ianao. Raha izany no tokony hataon'ny
Kristiana dia miala tsiny aho. Tsy mpamaky aho. Tsy
mamaky gazety akory aho. Miala tsiny“. Ary nitondra
fiara nidina teo amin'ny arabe nankany amin'ny trano
manaraka izy.

Teo amin'ny zorony manaraka, dia nahita boaty
mavesatra ho arina izy. Nisarika ny masony mba
hijery ny ao anatin'ilay boaty. Nisy Baiboly vaovao iray
tao, mbola tao anaty fonony plastika. „Eny, Tompo ô,
hamaky ny Bokinao aho.“

Tsy vitan'ny hoe nanomboka namaky ny Baiboly izy,
fa niditra tao amin'ny fiangonana niombonan'ny
Nicholsons. Niseho tamin'ny akanjo mena midorehitra
izy, ary nisy famantarana ny orinasa fako teo anoloana.
Io no tsara indrindra nananany. Teo aloha indrindra izy
nipetraka, sady faly toy ny zaza nomena vatomamy.
Nahafinaritra azy daholo na ny hira, ny fitoriana,ny
hatsaram-panahin'ny olona. Rehefa nisy nanontany azy
ny antony nanatrehany ny fivoriam-bavaka ny talata sy
ny fivoriam-bavaka ny alarobia, dia hoy izy: „Tsy
mainty mamonjy fotoana roa aho. Mbola maro no

tokony hianarako.”

Fotoana fohy taorian’ny fiovam-pony dia natao batisa i Reg. Nampin’ny Tompo ho afaka tamin’ny fisotrona toaka. Tsy vitan’ny hoe nazoto tamin’ny fanatrehana fivoriana tamim-pahatokiana izy, fa nitondra ny namany hihaino ny filazantsara ihany koa. Nankafy ny famonjeny izy hatramin’ny andro voalohany.

Tsy afaka ny areti-pony, fa afaka nahita asa tsy dia mafy loatra izy nandritra ny taona maro. Dia niantso azy hody ny Tompo, rahalahy malala ao amin’i Kristy, izay nantsoina avy teny amin’ny lalana ka voahasa ho any amin’ilay fanasana lehibe.

Ary izany rehetra izany dia tanteraka satria nisy vehivavy mpikarakara tokantrano mahatoky nivavaka hoe: Tompo ô, ampiasao aho.

Toko fahasivy amiby roapolo

TSY HO AMPY NY FOTOANA...

Isan'andro, maro ireo Kristiana manambara ny toetran'i Jesosy. „Tsy ny vatany no hambarany, fa ilay fo sy fanahy vaovao izay nohavaoziny, ny fahamasinana, ny fitiavana, ny fanetren-tena, ny hatsaram-panahy, ary ny famelan-keloka. Ireo no mahaforona ny toetran' Andriamanitra.“²⁶

Nahita taratra an'i Jesosy aho amin'ny fandraisana vahiny. Isaky ny miantrano amin'olona aho mandritra ny asako dia hitako ary hiaainako fa miafy foana ny mpampiantrano ahy. Nomeny ahy foana ny fandriany ary ny fisasany no nasainy nampiasaiko hatrany. Nisy fotoana ary nampiantrano olona 16 ilay fianakaviana ka ry zareo mianakavy tompon-trano dia tany amin'ny garazy no natory. Tany Taiwan ihany koa, dia nisy misiônera iray natory teo amin'ny tany fa izaho kosa natory teo am-pandriany. Nanamafy mihitsy ary izy fa teo no nahazoany hafanana kokoa noho za teo am-pandriana. Noraisiny toy ny hoe i Kristy ny vahiny rehetra tonga tao aminy. Nisy rahavavy iray ihany koa tany Colorado tratran'ny lozam-pifamoivozana teny andalana raha andeha hivavaka maraina. Nitaky fandidiana haingana ny ratra nahazo azy. Rehefa tonga saina izy, ny teniny voalohany dia hoe: „Iza no hikarakara sakafo hariva ho an'ireo vahiny ao an-trano ireo?“

Rehefa mieritreritra ny hatsaram-panahin'i Jesosy isika, dia tonga an-tsaintsika foana ny fitiavany zaza sy

ankizy. Ho an'ny mpianany, dia fanelingelenana sy fanakorontanana izany. Tsy izay anefa hoy Jesosy Tompo: „an'ny toa azy ny fanjakan'ny lanitra”. Lasa saina aho indraindray fa nahazo aina kokoa tamin'ny ankizy madinika noho ny tamin'ny olon-dehibe Izy.

I Sadhu Sundar Singh dia nanahaka ny Tompony. Matetika izy rehefa nivahiny tao amin'ny trano iray, dia mipetraka amin'ny tany ary niara-nilalao tamin'ny ankizy. Indray alina dia nisy ankizy nanontany hoe: „Neny, afaka ampatorin'i Jesosy ve izahay anio alina?” Nahita an'i Jesosy tao amin'i Singh izy ireo.

Lehilahy iray maika no nandona be no nandona ankizilahy nitondra entana ka nilatsaka ireo, avy eo nibedy azy toy ny hoe avy ilay ankizy no diso. Nisy mpandalo hafa teo nahita ny zavatra nitranga ka nanarina ilay ankizy. Sady nanome vola kely azy ahafahany manolo ilay entana simba. Tsy nahazatra ilay ankizy ilay fihetsika ka nahatonga azy hanontany hoe: „Tompoko, ianao ve i Jesosy?” „Tsia“, hoy ilay Kristiana namaly, „fa izaho dia iray amin'ireo mpanara-dia Azy.”

Ny mpino hafa dia maneho ny toetran'i Kristy amin'ny alalan'ny fifehezana azy ao manoloana ny fihantsiana. Nisy misionera iray tao Quito niharan'ny lozampifamohivozana. Nisy vehivavy iray nivily niankavia avy teo amin'ny lalana havanana no nidona tamin'ny sisin'ny fiarany. Nompain'ilay vehivavy izy, ary namely tehamaina azy avy eo. Rehefa niverina teo amin'ny fiarany izy, dia nisaotra ny Tompo noho ny vokatry ny Fanahy antsoina hoe fifehezan-tena. „Na dia kely aza ny simba amin'ny fiarako, lasa saina ihany aho hoe mety ho ahoana ny fihetsiko raha toa ka tsy nanana ny Tompo

aho?”

Dr Ida Scudder dia dokotera misionera any India nandritra ny taona maro. Nanana toe-tsaina tsy mamaly faty. Nisy silamo iray nanontany azy indray mandeha hoe fa ahoana izy no toy izany. Talohan'ny hamaliny, dia nanome ny valiny ny namana Hindo iray, izay nahafantatra an'i Dr Scudder. „Tsy fantatrao ve ny antony? Satria ny Andriamanitr'i Dr Ida dia manampaharetana sy be fitiavana, ary mitovy amin'ny Andriamaniny izy.”²⁷

Ny fiahin'i Jesosy sy ny fitiavany ny olona tsotra sy mahantra no hanisan'ny hanarahintsika azy. Borden of Yale dia zanaka mpanankarena, indraindray dia hita nanasa vilia tany amin'ny misiona tany amin'ny faritra tsy misy mponina. Rehefa nody ny evanjelista britanika iray, dia nisy nanontany azy hoe: „Inona no tena nampiaiky anao tany Etazonia?” Namaly izy hoe: „Nahita an'i William Borden, ilay zanaka mpanankarena, namihina olona naloto sy nahantra tamin'ny tanany roa.”

Tsy ambakan'ny hafa ihany koa ny fomba nanarahan'i Paul Sandberg ny Tompo. Indray andro izy dia niditra tao amin'ny trano fisotroana kafe iray, nipetraka teo amin'ny seza iray, ary nanomboka niresaka tamin'ilay namany teo akaikiny. I Paul, mpihira malaza, dia nitory tamim-pahatokiana tamin'i Fred ary tamin'ny farany dia nanana tombontsoa hitarika azy ho amin'ny Tompo. Afaka herinandro vitsivitsy anefa, dia voan'ny homamiadana ary efa ambavahoan'ny fahafatesana i Fred. Ny alina nahafatesan'i Fred, dia nitroto azy i Paoly, ary nitanisa

andinin-tsoratra masina. Antsoiko hoe fangorahana izany.

Rehefa nanapa-kevitra hanorina trano fiangonana ny fiangonana Kristiana kely iray tany Japon, dia nitety ny manodidina rehetra izy ireo mba hijery raha misy manohitra. talohan'ny hanombohan'ny asa anefa, dia nisy olona 1 hafa izay nipetraka teo akaiky teo natahotra fa ho takon'io fiangonana io ny hazavan'ny masoandro rehefa vita eo io. Tsy mba nanome tsiny azy ny Kristiana tao, fa noresahiny ilay mpanamboatra ary novaina mihitsy ny firafitry ny trano mba tsy hanahirana ilay mpifanolobodirindrina. Sady faly no gaga ilay lehilahy: faly izy fa hahazo ny anjara masoandrony, ary gaga noho ny toe-tsain'ny Kristiana izy.

Raha tahaka an'i Jesosy Tompo isika, dia hanana fitiavana sy fiheverana ny olona amin'ny fotoana sy toerana rehetra. Fanaon'ny fianakaviana Elliot ny nanao mandinika ny baiboly rehefa maraina. Indray maraina, raha namaky ny Baiboly I Elliot, dia nandre ireo dabam-pako nihetsiketsika teo an-tokotany. Avy hatrany dia napetrany teo anilany ny Baiboly, nosokafany ny varavarankely, ary nanao fiarahabana tamim-pifaliana ho an'ilay mpanangom-pako izy. Taminy dia tsy nisy asa heverina ho ambony kokoa noho ny iray hafa. Nitovy foana na ny fiainam-panahiny na ny fiainana andavan'androny.

Modely amin'ny lafiny rehetra amin'ny fiainana i Kristy. Hoy ny mpandraharaha iray momba ny mpandraharaha kristiana iray: „Tsy mila fifanarahana an-tsoratra ianao rehefa mifandray aminy. Nifanaiky

tamin'ny teny fotsiny izahay.“ Tsy mba nitaky fifanarahana tamin'ny olona hafa mihitsy io mpandraharaha io.

Nilaza ny mpitsara baolina kitra iray hoe: „Rehefa mitsara lalao misy an'i Tommy Walker aho dia iraika amby roapolo ihany no mpilalao fa tsy roa amby roapolo.“ Tsy handika ny fitsipika mihitsy i Tommy.

Rehefa nilaza tamin'ny mpanjifa iray ny mpandray olona momba ny hetra iray mba tsy hanambara fidiram-bola be, ka nanome toky azy fa tsy ho fantatry ny fanjakana mihitsy, dia hoy ilay Kristiana: „Tsy maintsy manambara izany aho. Kristiana aho.“ Nisy fiantraikany tamin'ny volany ny finoany.

Fotoana fohy taorian'ny namonjena azy, dia nilaza tamin'ny olona ho mpanjifa iray ny mpivarotra fiara efa niasa iray hoe: „Tsy manana io modely tediavinao io aho.“ Tsy toy izany ny no fomba fiady rehefa hivarotra fiara.

Tsy nety nanao sonia fiantohana sandoka ho an'ny marary ny dokotera kristiana iray, ka nitarika ny manodidina hanilika azy.

Notazonina tany amin'ny ladoany ny entana misionera iray satria tsy nety nandoha tsolitra izy.

Rehefa avy nanao fanekena am-bava ny mpino iray mba hivarotana ny tranony ho \$250,000, dia tonga ny mpitsoa-ponenana iray hafa ary nanolotra \$265,000. Inona no tokony hataony? Ao amin'ny Salamo 15:4 ny valiny. tsy miova. Aleo very \$15.000 toy izay very ny fahatokisan'ny hafa. Ny finoantsika tokony hitovy foana anaty ny herinandro, ny alahady hatramin'ny asabotsy.

Indraindray isika dia mahita ny toetran'i Kristy eo amin'ireo izay miaritra ny fitsapana. Nisy mpivady Kristiana tamin'ny farany niteraka, rehefa niandry an-taonany maro. Nampalahelo anefa fa maty noho ny fahasemporana ilay zaza, volana vitsivitsy tatỳ aoriana. Hoy ilay pasitera: „Ny tena nanaitra ahy sy nampihetsi-po ahy dia ny hira nataony tao am-piangonana hoe: Ho an'Andriamanitra, ilay harambatoko anie ny voninahitra. Hitako ilay reny nitsangana, niaraka tamin'ny vadiny, ny ranomaso nilatsaka nefa toa tony ny fony sady nanao hoe:

Ho anao ilay vatolampiko

Tsara sy mahitsy ny asanao

Andriamanitra, mahatoky, marina

Ianao no tsara indrindra

Tsaroako ihany koa ny momba an'i Beverly West. Vao avy nilaza taminy ny dokotera fa voan'ny homamiadan'ny havokavoka izy. Ary tamin'izay fotoana izay dia nandre izy fa i Gary Wilson dia tany amin'ny hopitaly voan'ny aretina sarotra sitranina ihany koa. Dia nipetraka izy ary nanoratra izao manaraka izao:

Ry Gary, Beth ary fianakaviana manontolo. Tianay ho fantatrareo fa ao anatin'ny vavakay isan'andro sy mandritra ny tontolo andro ianareo. Enga anie ianareo ho hampiononon'ny tana maherin'ny Tompo. Ho tazominy amin'ny heriny sy ny fahasoavany ianareo. Koa satria vao haingana aho no voan'ny homamiadanan'ny havokavoka ity ary eo am-panarahana fitsaboana mifanaraka amin'ny

*izay, dia manana fotoana be hivavahana aho.
Ianareo no eo amin'ny laharana voalohany.*

*Olona iray, Amy Carmichael ao amin'ny Gold by
Moonlight, mpino izy io dia nanipika fa ao amin'ny
Filipiana 3:10 ny herin'ny fitsanganany amin'ny
maty dia mialoha ny fiombonana amin'ny fijaliany.
Enga anie isika rehetra hahafantatra an'i Kristy
tahaka io. Tombontsoa ho antsika ny mahatsapa ny
niainan'i Jesosy tao Getsemane sy teo amin'ny
hazofijaliana. Ka hanomezany hery ho antsika
hiteny hoe: „Aza ny sitrapoko anie no hatao, fa ny
Anao.“*

John sy Beverly

Rehefa nilaza tamin'ny Kristiana ny dokotera iray fa tsy maintsy hesorina ny masonry iray ary ho soloina maso vera, dia hoy izy: „Azafady, ry dokotera, ataova an'izay hitanao tsara indrindra ao.“ Izany ry namana, dia fandresena amin'ny alalan'ny fanekena.

Nisy nanoratra hoe: „Mahafaly fahafahantsika manambara ny toetran'i Kristy amin'ireo izay mitady azy. Amin'ny alalan'ny fijorontsika ihany dia afaka maneho amin'ny hafa fa tsara ny manahaka ny Tompo. I Paoly mo niteny an'i Titosy sy ny mpino hanao tsara ny asany „mba hahatonga ny fampianarana momba an'Andriamanitra Mpamonjy antsika ho tsara amin'ny fomba rehetra“ (Tit. 2:10). Tsy fahamarinana tsara henoina fa fahamarinana tsara ho ampiarina no ilain'ny olona tsirairay.“

MIAINA MIHOATRA NY MAHAZATRA

Lasalasa saina sady variana nandinika vato marbra tao amin'ny biraony i Michelangelo. Avy eo, nisy namany nanontany azy hoe nahoana izy no nandany fotoana be nibanjina an'ilay vatolampy. „misy Anjely ao aanatiny ao ary hanafaka azy aho.“

Misy afaka andraisantsika lesona ara-panahy izany. Kristy mitoetra ao amin'ny Zanak'Andriamanitra rehetra. Hoy ny apostoly Paoly tamin'ny Kolosiana: „*Kristy ao anatinareo, ny fanantenana ny voninahitra.*“ (Kol. 1:27). Araka ny Galatiana 2:20 dia mitoetra ao amintsika i Kristy. Fa izao tontolo izao dia tsy mahita Azy raha tsy efa ao aminy. Mitranga izany rehefa maneho Azy amin'ny fomba fiaina araka an' Andriamanitra isika kristiana. Rehefa miteny sy manao araka ny sitrapon'ny Tompo isika na rehefa avelantsika hitondra ny fiainantsika Jesosy Kristy.

Ny fijoroana vavolombelona dia tsy vitan'ny hoe manao toetra mendrika fotsiny ihany. Tokony fomba fiainantsika mandeha hoa azy zany. Ny olana ela loatra isika manapa-kevitra marina rehefa misy zavamitranga amin'ny fiainana. Mamaly amin'ny fiainana izay mihoatra ny mahazatra no tokony ho ataontsika. Efa aty aoriana isika vao tonga saina sy manenina miteny hoe: „Afaka niresaka sy nandresy lahatra tahaka ny nataon'i Jesosy anie aho tamin'ny eh” indrisy tara loatra. Tsy resintsika ny nofontsika.

Ny amkamaroan'ny olona dia tsy nandà an'i Jesosy

Kristy. Fa ny fihetsika asehontsika, dia ny toetra ratsintsika, ny fanesoana, ny fitsiriritantsa ary ny fitiavan-tenantsika no tena manosika ireo handà an'i Jesosy. Lasa tsy hitany amintsika ny fitiavana sy ny hatsaram-panahin'ny Tompo.

Ahoana no ahafahantsika manambara an'i Kristy amin'ny olona sady tsy mahita na mahafantatra Azy? Ahoana no ahafahantsika miaina mihoatra ny mahazatra? Afaka maneho an'i Kristy amin'ny alalan'ny fanetren-tena, ny fanompoana, ny tsy fitiavan-tena, ary ny fiheverana ny hafa voafintina noho ny tenantsika isika. Ny *fonenan'ny Avo Indrindra*“ (Sal. 91:1) amin'ny fijanonana eo akaiky an'i Jehovah, amin'ny fipetrahana ao amin'ny fitoerana masina fa tsy any amin'ny manodidina. Afaka ho an'ny Tompo foana ny fotoana hiainantsika.

„Fa isika rehetra kosa amin'ny tava tsy misarona dia mijery ny voninahitry ny Tompo toy ny amin'ny fitaratra, ka ovana hahazo izany endrika izany indrindra avy amin'ny voninahitra ka ho amin'ny voninahitra, toy ny avy amin'ny Tompo, dia ny Fanahy.“ (2 Korintiana 3:18).

Arakaraka ny hibanjinantsika ny Tompo ao amin'ny Baiboly no hanovan'ny Fanahy Masina antsika hitovy endrika aminy hatrany.

Endnotes

1. Major Ian Thomas, nalaina tao amin'ny "His Victorious Indwelling Nick Harrisno, ed, Grand Rapids, MI: Zondervan Publishing House, 1999, pejy 133-134
2. The Idiot, Ware, Herts, England, 1996
3. Nalaina tato amin'ireto boky manaraka ireto: Brother Indeed, Frank Holmes, Lond: Victory Press, 1959.
4. Chief Men Among the Brethren, Hy Pickering, London: Pickering & Inglis, 1931
5. Nalaina tao amin'ny In All Their Afflictions, Murdoch Campbell, Resolis, Scotland: Seld-published, n.d, pejy 90-91
6. Nalaina tao amin'ny The Way of Peace, H.A Ironside, New York: Loizeaux Brothers, 1940, pejy 176-17
7. Nalaina tao amin'ny horonam-peo #150 Flirting with the Truth, Ravi Zacharias.
8. Nalaina tamin'ny Our Daily Bread, Grand Rapids, MI: Radio Bible Class, reading for June 28, 1995. Also, from tape by Lloyd Oppel, Feb 5, 2000
9. Nalaina tao amin'ny Flying Scotsman, Sally Magnusson, New York: Quartet Books, 1981, ary ampahana boky isan-karazany
10. The Flying Scotsman, pejy 9-10
11. The Flying Scotsman, pejy 163-164
12. The Flying Scotsman, pejy 174
13. Nalaina avy tao Philippians, The Gospel at Work, Merrill C.Tenny, Grand Rapids, MI: Wm B.Eerdman Publishing Co, 1956, pejy 60
14. Nalaina avy tao amin'ny "Living by Vows", Christianity Today, October 8, 1990, Pejy 38-90 sy "Muriel's Blessing" Christianity Today, Febroary 5, 1996. Samy nosoratan'i Robertson McQuilken.

15. Nalaina avy tamin'ny taratasy nosoratan'I Jim Haesemeyer
16. Tragedy to Triumph, Frank Retief, Milton Keynes,England:Word Publishng, 1994, pejy 148
17. The Pilgrim, E.Schuyler English,ed,Vol. IX,No 4 Aprily 1952,pejy 2
18. London: Banner of Truth Trust, 1970 pejy 149
19. Nalaina tao amin'ny horonam-peo #118 Raised to Run: Jacob by Ravi Zacharias
20. Tramp for the Lord, Corrie Ten Boom, Old Tappan,NJ:Fleming H.Revell CO, 1974, pejy 53-54
21. Ny iray na ny roa amin'ny fanehoana an-tsoratra ato anatin'ity boky ity dia fitambaran'ny zavatra tena niainan'ny olona maromaro
22. Nalaina avy tamin'ny Gladys Aylward.The Little Woman, Gladys Aylward araka ny voalaza tamin'I Christine Hunter, Chicago, IL:Moody Press,pejy 109-120
23. Nalaina tao amin'ny horonam-peo #118 Raised to Run: Jacob by Ravi Zacharias
24. Nalaina avy tamin'I John Nelson Darby, Max S,Weremchuck, Neptune,NJ, Loizeaux Bros, 1992, pejy 149-150
25. Nalaina avy tao amin'ny Our Daily Bread, Aogositra 23, 2000
26. Nahazoana alalana avy tamin'I Louise sy J.B Nicholson, Jr.
27. Daily Notes of the Scripture Union.Further documentation unavailable
28. Nalaina avy tamin'ny Our Daily Bread, Febroary 9, 1993

